


利津縣新誌



利津縣新誌卷之七

宦蹟誌

凡宦歷茲土者均膺民社風教之責者也上以子視民民自當以父母報上苟有德化及人道愛堪傳民且思慕之歌咏之歷百世而誦說不衰也故職官之後復誌宦蹟非贅也欲以爲後世法也

高謙亨字益之直隸深州人由省舉至元間任縣尹守法奉公門無私謁三年政成俗變以



文廟未建無以妥 先師神靈起瞻仰庀工
鼎建肖像崇祀選民間俊秀充弟子員講學
業考行藝利津學校之興實自高公始見祀
名宦祠

林海霖本縣仁義鄉人由人材洪武間任知縣
清約慈惠政善民安有古循良風

姚志寧字孟安蒲州人進士永樂間任知縣處
事公平奉法不阿黎民畏服

司馬符會稽人舉人永樂間任教諭學博行修

勤於訓迪聘典廣東文衡爲縉紳所推重

吳恭洛陽人字敬叔由儒士永樂間任訓導勤
於啓迪日坐齋改課歷任九年雖祁寒暑雨
亦無倦容

畢忠字庭臣固安人舉人正統間任知縣廉能
有爲撫字無倦秩滿奏留不獲調河南臨漳
縣知縣比去百姓哭之如失帖特

曹建浙江仁和人歲貢天順間任訓導性至孝
母已故自悔祿養不及刻木爲親晨夕冠帶

進飲食歲凶見有菜色者輒出已俸煮粥贍之

陳仲成字克修河南裕州人舉人成化間任教諭經學修明樂成後學憫一時教弛嚴立條約以身先之至今士類彬彬迪修行業先生之功居多

陶福字天祿浙江臨海人舉人成化間任知縣剛果有爲學問該博興學校舉廢墮勸農桑築堤防凡可利民優士者銳然爲之比去士

民頌不絕口

楊儉字節夫河南儀封人舉人弘治間作令利津績密敦篤廉潔無私勸懲士類惠愛黎元公庭嚴肅裁決公明時僚友無敢進一言者未幾以疾致仕百姓奔走環泣攀轅留之

趙鏗浙江臨海人舉人弘治六年董教事經學宏遠行履端方勤教誨作士氣聘典福建文衡尋陞懷寧縣知縣

魏彥昭容城人舉進士第拜監察御史正德間

謫利津丞時流賊劉七縱橫趙魏間其勢浸
逼公以津城卑淺夙夜役壯丁增高浚深戒
民儲戎器爲守禦計衆皆竊笑以賊所過無
堅城修之何爲外雖聽命而實預擬徑竄以
便奔竄公聞之不懌益督巡不怠夜坐常達
旦雨不張蓋如是者年餘一日賊騎千餘至
城河東無船不得渡衆以爲無虞公獨憂之
會夜大風河凍水堅賊遂渡河逼城公乃屬
官吏集境內士大夫豪俊分地而守又密遣
使請兵於鄰境徒廓外積粟於城內不令爲
賊資賊多以虛聲恐喝陷城公選輕騎數十
使疾馳城下往來爲疑兵布置甫畢賊果至
營於西北郊公分其衆爲數隊迭出擊賊自
晨及晡賊度不支以其衆遁去城得無虞入
名宦祠

董濬江西樂安人正德七年由貢授訓導歷任
三年日惟與諸生窮究聖賢工夫體認良知
宗旨一切贊儀束修毫不私受貧生有無力

婚葬者捐已俸助之一時士習學術皆賴此
公振作迄今相傳有陽明之風

李寶直隸武清人吏員熟諳刑名聽訟明敏歷
任九年庶務畢舉民猶至今頌之

楊啓芳字汝含直隸寶應人舉人嘉靖二十九
年任知縣資性聰爽才識疏通廉慎公勤仁
明果斷完逋負卹民瘼鋤豪強振士氣毀淫
祠拆其材以修學宮歷任五載比去民爲立
去思碑見存

徐滋浙江臨海人貢士嘉靖三十年任教諭氣
度閑雅襟懷灑落問學該博敷教詳明至今
津士猶想其丰采云

賈光大字實甫河南杞縣人由舉人隆慶五年
任知縣均田有功津民懷之事見祠堂記

周日強北直蠡縣人由舉人萬曆末尹利津公
廉明斷節用愛人稽冊籍以正飛詭均賦役
以甦里甲惠政不可悉數時邑久乏科第公
設爲聚星會一月三試厚供饌勤督課與廣

利津縣新誌 卷之十 五
文熊公次第而甲乙之自此科目遂多皆公
作養所致也比陞任去士民感其德立生祠
祀之

韓景星北直長垣人由貢途知利津縣慈祥
利物平易近人爲政寬猛互劑事不煩而就
理敬禮士夫崇尚學校蓋近世循良之僅見
者也

王國昌字春宇永平府昌黎縣人崇禎末任二
尹居官清儉處事敏達嘗署濱州篆廉約持
躬惠愛利物後署樂陵縣時山東被兵竭力
守禦城得以全旣而旋縣復理縣務傷殘之
後倉中尚餘米數百石儘可自潤公毫無所
利盡捐賑逃難回鄉者又借增築城池做工
人日給二升被難貧民全活甚衆至今士民
頌之

許養高遼東衛人順治初年任知縣時喪亂初
平生理維艱公下車卽拊循疾苦與民休息
時遇奉文清丈地畝照墾熟編額公爲民申

請從濱州例止得熟地三分之二徭賦比舊亦減三分之一不二年而民安生樂業日以殷庶後行之十年竟廢其制居官廉而平嚴而不苛士民畏威懷德建生祠祀之歷陞冀南道副使

馮執中廣東恩平縣人以舉人萬曆二十六年尹利津時津苦歲饑公捐俸煮粥散金錢以賑濟窮民又以士子多貧寒創置學田三十餘畝爲諸生贍養之資迄今士民多頌其德

利津縣新誌卷之八

人物誌

鄉賢

孝義

貞烈

仙伎

賢才不擇地而生津彈丸亦奧區素親鄒魯文學之教故古今顯宦雖不多見而績著藩臬者有之風生臺閣者有之聲清琴鶴者有之以及男子之孝義女士之貞節奇行異蹟亦自先後接踵焉因詳識以便覽

鄉賢

明

李益字守謙洪武四年以人材舉授戶部主事
清約自持奉法惟謹居官數年服不更衣會
聖誕日有旨命百官俱服錦繡服色公初無備
乃倩千戶服色服之上見詰其故益以實
對上命搜其家止得俸米數升于皂靴中
太祖爲嗟歎良久特賜錦衣一襲以嘉其清
轉江西饒州府通判尋陞本府知府在任十
八年習知民情大有惠政饒民戴之若父母
永樂初饒境蝻爲害益齋沐竭誠徧告羣神
忽大雨如注蝻盡死嗣歲又大旱民憂叵測
益率父老徒行四十餘里懇禱於龍潭禮未
畢雨隨至遂大有年陞山西左叅議饒民赴
闕奏留賜食叅政俸留居二年後之山西民
不忍別立祠繪像祀之其在山西以命督省
人夫修北京宣武門及城墻功完陞本司右
布政懇乞致仕公爲人天性至誠不事雕琢
其政績著聞見大明一統志及爲政要典今
從祀本縣鄉賢祠

永濟縣志
卷之八
隆英字俊傑由舉人永樂間任南宮縣知縣清
謹自持惠流恩洽在縣九年吏民胥服擢山
西道監察御史嚴毅英明大振風紀尋陞廣
西按察司僉事繩貪墨釐宿弊抑豪強無一
毫假貸正統間猺賊出沒大藤等峽百姓驚
擾邊境震撼英率官軍剷除略盡論功居最
後以疾卒于官贈奉政大夫

李聰字存智益之子也永樂間由舉人任直隸
大名府學訓導經明行修教人有法一方士
子多所矜式大名久乏科目聰所轄齊鄉試
中一人時有例教職功績著者取補風憲會
同僚秩滿績殿不敢奉例聰以所轄一人讓
焉至卽擢監察御史未幾又中一人改陞山
西汾西縣學教諭聰至因其學規廢弛嚴立
科條循循善誘士風大振甫二載卒于官公
重行義甘淡泊勤於成物疎於理家居官二
秩囊橐蕭然比成化間以子芳貴勅贈監察
御史人以爲讓德所報云

王英字彥華舉人永樂間任河南陝州學正改許州已而伴讀梁府陞鳳陽府照磨知府察其學行端謹吏事精通列上薦爲本府推官尋陞湖廣辰州府知府剛毅有爲不避權勢時有總兵官某恃勢威虐部民公舉劾其事一方稱快英廉明有守爲官不治家子孫貧乏至今僦屋以居清議重之

馬傑字廷英由監生天順間任陝西鳳翔縣知縣尋改寶鷄修學勸農興利除害不三年政

績懋著當道交章薦其賢陞鄜州守鄜民頑梗素稱難治前守鄜者往往坐席未溫相繼解組而去傑至繩之以法屏絕私謁勤恤民隱振起士風凡六載民庶帖服旌獎迭加當道又力薦之尋陞慶陽府知府歷三年懇求致仕歸田二十七年壽至九十三歲猶讀書好禮不倦鄉人扁其堂曰五福堂

李芳字德馨益之孫舉成化丙戌科進士擢授監察御史執法奉公彈劾不避權貴戶部尚

香海集新言 卷之八 四
書項忠被誣芳爲奏理得直巡歷山右禱雨
賑饑存活萬人又巡畿內八府所至有冰蘖
聲陞江西副使按察司廉使剔弊除奸凡可
爲國爲民者率攘臂爲之無所顧忌芳自少
能文重行誼厭奔競薄權勢居官數十年不
置產業比歸囊橐蕭然築草堂兩楹謝絕人
事讀書樂道宴如也集弟姪數十人與共炊
爨習舉業咸賴之以成立云

張瓚字道善舉人天順初任山西秦榆縣學教

諭轉高陽鞏縣無極三學平生謹厚甘淡薄
雖在倥偬未嘗疾言遽色典教四庠操守一
致日與諸生講解不倦隨所至德化沛然成
化間校文江右衆稱得人今以科目敷歷中
外者率多其門生云

李應宗字紹之益之孫也舉人成化間任陝西
平定州學訓導丁內艱制滿轉河南南長葛縣
學勤問學謹政事後陞河南南陽府學教授
遠近從學者以五經之學上聞欲大究厥施

雖迄不果當道多奇之弘治初舉河南纂修總裁未幾南陽郡三城王請應宗主五經賓會王賜宴曰先生之才著聞朝野寡人以禮敦請用開後學遂大闡五經之意尋當考滿舍去作詩贈行有方資進講六經學遽爾還登千里途之句又有中解李鸞者公之門人有贊行詩曰孝友宅心詩書爲業太和之風中秋之月後又轉河東運司學教授甫二載夜起呼童秉燭索衣冠端坐而逝

楊昭字顯之宣德二年貢初任苑馬寺丞牧養有方尋陞北京太僕有雅操在官二十年家無衣帛時稱爲清白吏

李驥字尚德爲人篤實鄉閭推重以貢入太學後謁選天曹授邠州同知多惠政值大旱虔誠禱雨輒應時邠有苗賊之變驥承委剿捕亂迄底平以疾致仕壽至八十八歲而終

田禎字世隆弘治己酉鄉舉陝西邠州學正丁母憂服闋當改除邠舉人劉澄寧奏乞復除

原任居九載甲子陞慶陽府教授會正德改
元纂修實錄事竣聘主江西丁卯鄉試尋陞
國子監助教轉興府右長史以禮事王正巳
不阿會藩屬郡王薨無適嗣庶子爭立府僚
受賄依違莫決比禎至卽啓王會議乃揚言
曰襲封有成憲豈容強爭此事若差關繫綱
常衆官相視愕然卽如議具奏遂定封焉以
子玉登進仕懇乞致仕王爲之上請授四品
服色歸世宗登極進階正二品嘉靖辛卯以
子侍御封奉政大夫

張佐字經世以歲貢任上海丞縣故有數十年
逋稅衆難其任佐至以禮諭百姓不施鞭朴
不朞年而足時山西陽曲縣亦積有逋負尤
爲難治御史以佐聞遂轉陽曲糧亦尋辦後
陞石樓知縣興利除害綽有惠政後致仕歸
爲人剛正毅嚴動以聖賢爲法貌恭而溫遇
後生於塗雖在髫年亦倚杖禮敬之不息年
八十六而卒

尹通字永常仁義鄉人初任北京虎賁右衛經歷丁父憂起授永平衛經歷調度軍餉毫無染指蒙撫按薦尋陞保德同知明敏剛斷見事風生弊除化行州治大振時值武宗西狩內臣江彬寵甚一時臣工驚慌不寧公獨奮身面折彬以忤劾武宗召問公朗言彬擾害狀武宗笑而言曰此老戇臣也隨賜以酒州境獲安在任七年因母楊氏疾致政歸晝夜衣不解帶數月無倦撫育幼弟周濟貧乏遠

近譽之壽七十九而終

魏綸字理之資性穎異爲弟子員日卽有時名弱冠中丁卯科鄉試辛未試春官落第以流賊猖獗奉母避難因設教雄庠資其祿養綸負氣節憤羣盜縱橫上弭盜十事朝議重之丙子典文湖湘拜南京刑部主事武宗南狩嬖倖江彬用事惡中貴楊經歷等假朝旨羅織害之綸知其詐執不從時論危之然終不能奪署貴州司事適廣東鎮守中官牛榮以

其黨數十輩齎番貨等物五六十萬假名進貢所至發賣規利事發賂上下求免綸獨抗詞執法沒其貨抵罪不少貸後齎表北上至江中榮結江盜邀截綸微服遁免尋以疾歸起補南膳部郎陞山西布政司叅議時巡撫劉大謨初涖臺以禮數責三司官於綸獨加誚讓連牘上劾有旨大謨與綸俱回籍後綸起擢陝西副使有惠政及人至立碑於韓范祠內頌之旋轉浙江鎮守溫處溫處多饋賊

衆五千餘人據險時出標掠官軍無如之何綸至爲檄諭以禍福遣吏以招安狀示之賊首素重綸應命而至責之曰若等抗違罪在不赦今聽若等自新可亟還巢穴放遣老弱簡選精銳赴府贖罪衆或疑其不還綸不聽居無何其人果率衆二千人來綸令營於教場外衆又恐不測公曰以赤心待之何慮焉卒談笑靖其難後以母疾懇乞致仕歸綸善於詩文隨在有著作

田玉字德溫望營鄉人登辛巳進士第任浙江
縣知縣廉能有爲惠愛旁洽以治績最
行取去任後闔邑耆老相率白新令願刻砥
以表去思郡守贛溪潘公欣然操筆大書曰
官已離任民尚懷思足徵愛字之政浹洽人
心丙戌擢南京江西道監察御史明敏剛果
見事風生後奉命督捕江洋羣盜事竣有金
帛之賜尋陞浙江僉憲督兩浙蘇松常鎮水
利時有當揆重臣囑以導引海塘以便巳私
者玉不聽忤其意其人遂中傷之玉因乞歸
養後當道雖屢厯薦剡竟爲權奸所沮齋志
以歿

李順孫字繼先登正德丁丑進士初授南樂知
縣有惠政陞刑部主事轉員外郎陞河南兵
備僉事發奸摘伏吏畏如神尋陞陝西叅議
一日巡歷郡邑至郊外見數人如鬼如魅忽
不見公驚異傳問之其人胥泣原皆商賈輩
被鑛賊掠其財且拘繫之令其穿鑛苦楚百

狀不見天日公卽以兵捕之俱得釋凡活數百人聲譽嘖嘖後以母老歸養數年詔復前職輒不起進三品公歸時三十有九居林下囊無厚蓄日與弟子講論詩藝恬然自得優游八十餘歲而終至今追先達高風必曰清涯翁云

尹道字本中仁義鄉人三歲失父家貧甚甫七歲卽能傭力以養其母母疾衣不解帶臥塌下侍湯藥者三月後應嘉靖初貢入太學授

樂亭丞時有嬖倖谷姓者縱僕侵民地千餘家民競訟之部使者以委道道卽拘其僕繩以法悉還其所侵地民卽於地所立碑頌之後致仕歸足不履市坊壽七十六歲而終

王聘字念覺仁義鄉人資性穎異童時卽不喜逐隊爲兒戲就外傳日雅知向學垂髫補弟子員父卒哀毀逾禮登嘉靖癸未進士第授盩至縣令大興水利登革奸蠹三年擢戶科給事中尋轉兵科在臺日務持體統不立異

爲矯矯名會兵部火廷議罪及該部聘抗章
論火乃天災非其辜忤旨左遷尋謫判直
隸太倉聘單車赴任時江洋益起境內繹騷
聘推誠招撫諭以禍福殲其渠魁東方以寧
部使者上其績賜金帛羊酒尋陞蕭山令
節財用損不急修陂塘抑豪右蕭民德之乙
未遷南京戶部郎中丁酉出守衛輝惠政流
浹民戴之若父母衛輝道通諸省館餽無虛
日聘應以閑暇若無事然己亥世宗南巡衛

輝行官災聘以守臣械繫至承天府民隨以
往旣至論杖杖幾死民號呼護掖調治始得
復甦編管遼東安樂州聘卽日携家往後
詔許冠帶閑住尋乞自効從戎古北口著軍
中機宜肆事上虞坡楊公公異之戊午卒於
邊聘器度開豁不飾邊幅忠誠恭儉率於性
真所至民爭立石頌德在遼左日以經史自
娛雜處軍民中未嘗自異蓋士林中之特著
者萬曆間縣令王與光爲請於當道祀諸學

官時撫按俱已報可惟督學議未下姑存之以俟論定

紀繡字思綱登嘉靖丙戌進士第授禮部主客司主事歷刑部員外郎陞廣東司郎中曾有誣奏勲臣不法事者衆懼不敢言公獨抗疏明其寃人咸以剛直許之奉命讞畿內獄虛心推覈至忘寢食罪疑者減等開釋無慮千餘人覆命稱旨擢鳳翔府知府在任清慎惻怛弊除化行府治大振尋擢陝西兵備副使

調餉有方邊需不乏獲賊中奸細孔哥兒等三人送京師廷賜白金以褒之壬寅以疾歸居家吟咏適志自號臥叟已酉詔補貴州按察司副使整飭威清等處兵備以征叛苗親冒暑瘴督兵渡盤江偶卒於行署公爲人天性明敏立志高潔讀書沉潛務得聖賢旨趣爲文不蹈襲議論本經史時以理學歸之事母孝感疾且篤閱方侍藥傾刻不離側日夕焚香籲天願以身代母疾尋瘳撫幼弟至成

利津縣志 卷之八
人略無倦意孝友著聞內外無間爲一方之表式云

魏闕字子瞻永和鄉人綸之子由貢士先任永平府通判因裁革補大名府又任延安府以直氣忤當道改四川重慶府教授尋致仕歸公平生質直緣父清要家處甚貧甘淡薄不俛仰于人歷官俱有惠政吏民思之延安去思碑見存及致政布衣徒行與鄉人雜處無纖毫驕態又未嘗出入公門享年八十三歲而卒鄉鄰慟之至今高其行誼云

王立身字思修仁義鄉人由甲子鄉舉初授河南考城令慨邑久凋敝銳意振刷而拊循之凡當路文移有不利于民者卽極言不諱藩封最號掣肘公至卽調停有法俸賦俱解於官如驛傳如條鞭實政俱載考城志并去思碑再遷延川令赴任道經考城考城民攀轅泣曰延川縣令卽前令考城者有德于民民至今念之願登薦牘毋負縣令也六歲擢平

承澤縣志 卷之八
涼二守調度固原戎政有法旣而以疾歿于
宦邸聞者惜之見祀考城名宦祠

王甲字第之聘之子也以隆慶丁卯科舉人授
山西平順縣知縣六載多惠政民甚懷之擢
大同府通判當道以公廉明公謹發帑金數
萬委賣市貨得羨餘八百兩悉以報官毫不
充私橐在任四年以招撫有功蒙欽賞五次
擢保德州知州時值孛賊之變李總兵統大
衆征勦公應籌裕如軍餉未嘗缺乏梅監軍
以其狀上聞蒙欽賞銀八兩擢四川夔州府
同知萬曆乙未以署篆上計考績居最夔民
無不引領冀其復來公且淡然仕路自詣部
乞休部司勉留之不得竟准致仕歸居鄉布
衣藿食恂恂長厚諸所舉動俱足爲後進典
型丁酉以疾卒閭巷哀之

紀穆字宗敬以增例貢監選河南濟源縣主簿
陞上林苑典簿遷山西按察司知事轉直隸
新城丞後陞陝西鎮番衛經歷因疾致仕更

永濟縣志 卷之八
歷數任所在多政績時有太學生史奇者爲
之讚曰化行玉川治體和平方行山同翠濟水
同清淑人君子色麗神瑩人以爲公之實錄
云

王協夢字肖甫以隆慶戊辰恩選萬曆五年授
山西岳陽縣知縣地僻民頑賦多逋負公招
徠流移多方撫字賦完而民不苦五年陞陝
西鞏昌府通判監收甘州歲度支軍餉不下
十餘萬毫無染指甫二年撫按會題陞臨洮

府同知仍管甘州事歷六年內和輯兵將外
撫駁蕃漢薦章凡七上蒙朝廷欽賞十次萬
曆十七年丁外艱回籍前岳陽民爲立去思
碑甘州又建生祠其得民心如此服闋補湖
廣黃州府同知尋陞趙府左長史未幾以疾
卒于官公歷宦二十餘年止有薄田數畝茅
屋數楹每慨本縣風俗漸澆人心日漓將爲
挽回之計然竟齋志以沒惜哉

李培字少春少穎異不羣爲文下筆立就中鄉

式第三名己丑成進士授秀水令在任九年
利興弊革以卓異著稱邑人士於通衢立石
誦之今近百年猶存隨擢雲南道御史剛果
有爲多所建明嘗一疏彈劾二十餘人皆當
路權貴直聲震天下後出巡真定墨吏聞風
競解綬去復轉應天巡按丁艱旋里卒

顧四明字孝泉仁義鄉人天性至孝爲諸生貧
甚爨下恒日不舉火公菽水承歡怡如也手
書不釋卷午未繼捷筮仕清苑視民如子有

舞文者輒寘之法奸吏皆匿去邑當衝繁以
不能骫骳上官故求改雲間司授敦名節課
經藝學有義租數百石按籍悉散諸貧生毫
不爲染忽聞親恙卽棄官乞歸上司與人士
堅留之弗得爲擬終養例得允親沒後補應
天授遷國子博士轉戶部郎曹己酉監兌蘇
松蘇松有貯存未解銀四十餘萬例充使者
私橐公悉摘疏其弊歸諸公帑陞吉安知府
吉安故理學淵藪公惟與諸生講論文義拔

識者多先後颺去會值大計公舉天下清廉
第一立應超擢而公復移疾以歸居里中杜
門不謁有司出必徒步或乘一驢携一蒼頭
自隨鄉人遇之不知其爲仕宦也至邑有大
利害必力白當道得請乃已后報推河南提
學副使而公已卒未究其用人咸悼之公善
相人慎許可初有子女數人求親者槩弗應
顯貴或領之公曰結姻須質直如吾友濟川
者乃可耳濟川蓋憲副魏公裔孫也以方正
重於時因爲子委禽焉旣而魏君生子彌月
公一見奇之曰他日必爲偉器復以女妻之
乃公子歿而女甫結褵亦亡魏子冒繼登科
甲人固推公之先識而天之報施抑何爽哉
迄今稱先達清白吏必以公爲首云

李植字燕翼號鉉篤鄉賢布政公之後裔也中
崇禎甲戌會魁初選直隸博野縣修城鑄砲
防禦有功兩臺交章薦之調繁長垣未任丁
父憂繼補陝西韓城縣韓人士萃聚公按月

考課多方作養及門中式者三十餘人選有
龍門社稿行世又奉旨砌磚城修芝川鎮城
民不勞而事畢舉屹然爲一方保障焉值歲
大饑人相食公捐俸倡先煮粥散錢救活數
萬人命且給牛力麥種招撫流民當時聞風
歸寓者共有一千六百九十餘家以連年荒
旱公疏通水利相度城西北域有山泉湧出
隨其高下濬渠引水灌田共濬渠二百四十
八道灌稻田三百九十餘頃其無水泉可通
者勸令鑿井灌田添設新井五百餘眼韓民
永世感恩勒之碑石督撫按俱首薦公紀錄
七次又以修練儲備四事特疏薦舉減俸行
取授山西道監察御史敢諫陳言糾參閣部
督撫范志完等數員舉朝震動疏請蠲免山
東二年錢糧闔省頌德此皆成績昭然著于
見聞者也

皇清順治元年補河南道監察御史公天性純孝以
母老多疾乞假回籍八年撫按薦舉特

旨起用九年巡按河南奉勅兼理屯政未及半載共
開過屯地一千八百六十餘頃因河南朱源
口決小民一工賠至六十餘萬公親詣河干
嚴飭河道有司不許濫派柳梢令河岸多栽
柳株就便取用民困獲甦永利無窮錢糧官
收吏解奉有嚴綸公訪知按屬多撥簽里
甲遂力行申飭永爲禁止有永寧縣鷹帳山
燒香聚衆邪教惑人擒拿首犯正法會銀發
司解部充餉仍通行闔省以正人心時奸棍
刁訟擊鼓登聞大爲民害公具疏條陳奉

旨下部院嚴飭一時刁風咸息糾叅衛輝所守備楊
應舉縱橫不職兵丁俱斂戢不敢犯法後聞
撤差之命卽刻回京雖止巡歷懷慶河南
兩府任內糾叅文武拏獲巨蠹獎節孝賑孤
貧善政難以枚舉都察院考核稱職留用第
一爲一時巡方所僅見焉十年丁母憂守制
未出優游林泉教子課孫不與門外事遇鄉
黨朋友謙恭和藹且生平敬慎詳密至誠無

僞人亦不忍相欺享壽七十一歲邑人公舉鄉賢時學使者開列太濫後爲臺臣李所叅駁奉 旨嚴議其去留學使者周乃於通省六百五十八人中擇其善蹟有裨社稷民生者止存二十名巡撫劉以公之嘉績懿行臚列上聞禮科滿漢公同考覈奉

旨特准配祀

王庚字紫瀾天性聰穎書史一覽不忘尤長于詩賦法帖其墨鈔卽鍾王不過也丁卯領鄉

薦以後場博雅俱錄程式一時紙貴居家清儉不屑屑求田問舍惟闢小園日吟詠以寄曠懷人咸以高逸目之晚諭剡城推代州守履任數載盡心民事而筮常生塵以勞瘁卒於官貧不能歸太史王公邵素重之力爲經紀其喪事始克還里誠所謂清白吏者惟位不酬才才不竟用士民至今惋惜

林森字木伯子母孤孀度日家甚貧無力延師母孫氏督之嚮學勤女紅刺繡每至午夜以

伴之森亦善體母志篤學不倦雖日一舉火而伊唔不輟尤工爲古文詞時當國初戊亥之際文尚綺靡制藝有通首不見之字者公獨遵尚程朱追踪兩漢故丙戌鄉墨座師有不染時艷之評多授生徒大要倡明理學力崇先正津人士稱不失先輩典型者至今推公云

孝義

李端仁義鄉人父敬義宣德間以罪配口外開平衛端時年六歲日夜號泣擊登聞鼓懇以身代上聞而嘉之准令代戍凡四十餘年後親老以子鵬替役歸養比親歿哀毀逾禮人咸稱其孝享壽九十七

王廷輔仁義鄉人景泰四年大饑巡撫移文勸借廷輔輸粟五百石助賑撫院嘉其義給以冠帶榮身

韓士名望營鄉人景泰間縣修築城池闔縣修城三面而士名獨修城北一面時人稱爲義

士

許棠弘治間貢士父杲成化戊子科舉人任吉州判父卒廬墓三年後任寧鄉知縣以父曾欲造文廟禮器遂捐俸易銅治器以成父志見貯儒學庫

李維則增廣生員原名世則天性純孝家貧母病夜半思食鹿脯苦不能得引刀割股詒以丁祭聖惠母食而愈值歲試搜檢解衣襪疤裂血湧文宗詢其故則以實對爲之嗟歎良

久遂命改名維則扁其門曰孝行可風聞於撫按給穀二十石以示獎

張尚志望營鄉人行誼醇朴值母疾旦夕侍榻旁衣數月不解帶居常輕財樂施每解推衣食衣食人戚黨王守義劉信貧不能葬輒爲營其塋事有劉崇諸人常寄食飲於其家悉爲收養賀天福凶年鬻女旣而還之又令其子庠廩生張閭出餼廩創義倉以贍厥宗會疫疾盛發膏草野者踵接則捨棺棺之義聲

著焉盜有窺其鄉者義之相顧曰莫驚此老翁嫗也萬曆己亥知縣馮執中聞其名覈實卽賓請之以風海邑仍登善藉給匾額以示勸云

貞節

元

劉氏馮伯寬之祖母也未笄適寬祖年二十四而寡二子一女在襁褓家貧甚躬採拾勤績紡以供衣食子女賴以成立家日以昌裕至

治初旌表貞節享壽八十餘碑記尚存

明

呂氏崔大成妻氏年二十夫卒一子甫二歲舅姑相繼歿家貧誓不再醮守志五十年撫孤成立冰蘖之聲聞於遠近

楊氏崔鐸妻氏年二十二而寡一女方週歲誓無他志資紡績以養其姑舅歷五十餘年有栢舟之風爲鄉閭所稱知縣胡昭上其事議永下而卒

張氏王讓妻氏年二十五讓亡一女方五歲以
死自誓屏絕鉛華四十餘年持身貞靜始終
如一人無間言

孟氏韓章妻章爲弟子員年十七一日晚浴于
池失足而溺氏年十六尚在室聞知痛哭幾
絕欲因送葬歸韓守制父母難之氏詒之曰
容終制改嫁未晚也父母許之旣而又欲別
圖不從比終制沐浴自縊而死

馬氏王晏妻氏年二十四生子未週歲夫卒哀
痛幾絕卽入室自縊死知縣樊經出絹五疋
令作大棺合斂葬之

李氏庠生紀瑄妻夫亡氏方二十一歲家貧勤
紡績以養其姑訓其孤繡甚嚴姑卒以禮安
殯守節六十一年詔旌表其門後繡登進士
第

張氏庠生安智妻智亡時氏一十九歲生子甫
及月餘儻室以居勤紡績以育其孤人不堪
其苦氏處之宴如或勸其改嫁以圖苟活泣

不從守節六十三年官聞旌表其門

薄氏王隆妻氏初許聘隆隆卒奔喪卽墓樹自

縊

孟氏高崇爵妻夫卒止一子矢志撫養事侍姑
最孝凡飲食浣濯之類靡不竭力爲之屬姑
有疾氏不食善以身代疾事愈享壽九十氏
壽亦至八十一終

張氏孟進輔妻進輔以病卒氏年二十號泣不
已誓與夫同逝翁並母崔氏勸諭不聽夜自

縊柩前比覺氣已絕矣縣令許公開之親臨
吊祭給棺同斂表其門曰貞節

夏氏庠生王濟妻濟病卒年二十六歲抱尸哀
慟絕而復甦遺孤立身甫四十日氏以死自
誓無二志家貧躬績緝養其姑以孝聞教子
成名舉嘉靖甲子鄉試

高氏王溥妻夫病卒氏方二十二歲號泣不食
或勸譬之氏曰吾嫂有子可以不死吾無出
將安歸衆知其必死輪守之次夜守者倦遂

潛縊于柩前提學副使鄒巡按御史周並匾
其門題曰雙節

王氏庠生于際妻際以疾卒氏號泣哀毀絕飲
食誓以身殉以舅姑在堂忍死奉養後二親
相繼不祿捐粧資營辦葬事悉如禮有欲奪
其志者氏正色拒之言者縮舌嶽政呂公廉
其事獎以粟帛縣令李公扁其門曰貞節

李氏庠生孟紹芳妻氏二十二歲夫亡無子二
女且幼卽斷髮孤帷矢志靡他事翁婆以孝
聞執喪如禮肅訓二女皆適儒門壽五十三
歲始終稱完節云

高氏李可昇妻昇邁奇疾卒氏年十九遺孤未
及週二母垂白孀居家甚貧窘從夫遺囑誓
守冰蘖躬紡績備女工侍養撫育惟謹後子
之華遊庠泮卓有文行未遂所志而孫培登
進士第聞者稱歎僉以爲節孝之報云

國朝

高氏庠生張恭妻氏二十九夫沒子未週歲日

永濟縣志卷之八
夜勤紡績五十餘年不怠縣令李公給粟二十石扁其門曰貞節

孫氏仁義鄉人生員林長春妻夫亡時氏年二十歲家計貧窘門戶孤單惟上有伯姑嫡姑暨庶姑俱當垂白下有幼子森方二歲氏矢志守節勤于紡績勞于刺繡奉三姑甘旨始終如一享壽七十五而終于順治十年撫按題請奉

旨建坊旌表又給粟三十石以贍老坊在儒學迤東
王氏儒士林萬春妻氏自二十四歲守節上無翁姑下鮮兄弟有二子長彬甫四歲次麓甫週歲家道空乏貧無立錐又值崇禎己卯奇荒藜藿不充氏卒歷任勤勞針指紡紉以易食粟兩三口垂絕之命得以全活至教子甚嚴鷄鳴促誦丙夜課讀兩子俱能成立有聲菘苑于康熙五年縣府申請 撫院劉 給扁旌其門曰陶孟齊芳

于氏庠生于遇春女適副憲公之曾孫紀大紳

少失所天志矢一死事八旬之公姑晝親并
日夜勤紡績孝行有裨於風化又值適姑早
逝奉繼姑畢氏無異生母訓子教孫儉用以
裕修儀勤苦以勵誦讀以故子能觀光上國
孫亦蜚聲藝苑婦節而兼子孝母德而秉父
型蓋不可多得於巾幗者康熙八年縣學公
舉節孝蒙 撫院劉 以栢舟永矢扁額旌
獎門閭

魏氏知縣郭饒男治烜妻烜垂髫游泮頗有文

名不幸早逝氏年甫二旬餘家貧如洗孑然
一身誓死靡他嫁女撫孤茹荼服勤五十餘
年如一日壽至八十餘歲而終士民具呈公
舉到縣擬申旌表云

張氏仁義鄉王喬齡之妻氏自十九歲守節生
一子方在襁褓氏卽哀號呼天誓死守志後
經崇禎壬午之變城陷子死凡功服以內親
友無有存者煢煢一身瀕危者再氏于橫尸
中求一門骨襯殯殮之五十年來子息俱無

貧窮不堪氏安心織紡處之淡如雖垂白之年循閩範如處子現今七十二歲士民公舉方申旌表

仙伎

李登仙仁義鄉一圖人字見田自幼卽好談鉉講易究心康節數學諸書長而曳裾王侯公卿之門占驗每無遺筴遂共號爲神仙

國初遊

都下一宦偶病疫思得鮮橘啗之時南北未溷一乃除靜室寂坐衆人扃戶伺之明旦

卽捧鮮橘以獻色味猶初人共驚異竟不知其何術云晚年出口詩文隨風珠玉每意到筆不停寫言言奇中甲午秋偶在學院朱座中去場期尚遠口占一絕有半畝方田堪種玉一匹老馬壯猶龍之句一時客未解也後榜發田領解額馬亦魁選名姓俱相符合其數學大抵類此容貌朴渾不衫不履而知幾如神享壽八十二而終殆東方曼倩之流亞也歿之日子振聲和聲等或以數學問但告

以忠厚傳家黃白丹砂無取也其爲仙謫人間有所托而寓于塵世也審矣有異人傳見朱滄起集中

黃章字恕涵浙江錢塘人以官生康熙十六年任利津縣津瀕海疲邑年來困雜輸公下車洞矚利弊悉行革除按糧均役減羨去耗一切起解車脚之費俱蠲資代賠邑素多隱漏荒田公奉文清覈倍足常額復爲詳懇當事輕徭薄賦民不苦累至如招撫流移開除逃亡凡爲百姓謀者無不詳明周至時學官頽圯久乏科目公涖任鼎新作養多士是歲秋紀子之捷發跡戊午武科又有紀子克寬士

風翕然一變四鄉中各置一義學延文行者
師之按月給資且於士之貧寒者年終周以
錢粟有差邑俠少者流喜鬪健訟名爲市虎
公至即皆斂跡又嚴審勾東四境安堵連年
天灾流行公自糴買穀八十餘石倡率紳衿
富室共輸助穀煮粥施賑生活多人又於士
民春耕時躬課農桑或乏牛種捐金貸之即
至秋成不能辦還皆焚券於庭且施藥捨棺
助婚葬贖子女使骨肉完聚至於日用供給
皆照市發價時有止飲清河一勺水不費民
間一文錢之謠歲已未

上諭通飭天下郡縣勸農積穀預備凶荒公創建義
倉四處捐積穀九十餘石復倡紳士捐助穀
一百五十餘石時值藝麥貧無種者即以穀
貸之約麥收還倉以備秋時貸借穀種歛散
規畫特詳專籍他如修縣署復養院創營廨
皆自捐鳩工又如城隍廟基宇全傾公一旦
更新之由大殿寢宮以及兩翼廊小祠等

利津縣新誌卷之九
然改觀嗣是關帝廟弘濟寺皆次第成功至
泣事精敏剖決如流案無積牘庭無滯獄間
有說法者一經鏡照即惛然悔伏蓋慈父而
神君循良而卓異也任四年陞萊州府膠州
知州士民思慕如失怙恃爲立德政去惠碑

利津縣新誌卷之九

雜誌

祥異 丘墓

事有可存者君子不沒其實示後知所法戒也
故察妖祥可以知天變觀丘隴可以識地理休
咎衰旺之數古今世變胥于是乎覘焉遂作雜
誌

元

泰定元年八月霖雨害稼

明

正德六年流賊劉七等寇城不克去

弘治壬子大饑

嘉靖甲申七月蝗飛蔽天傷稼

嘉靖己丑彗星見

嘉靖辛卯十一月夜天星散落如雪其光燭地

嘉靖乙未蝗傷稼歲大饑

嘉靖戊申八月十一日地震

嘉靖辛亥麥秀兩岐穀有雙穗

嘉靖壬午五月大清河溢壞城郭民居

嘉靖癸丑七月十八日大清河溢大傷禾稼歲

稔

嘉靖丁巳八月大風雨秋稼不登歲大饑餓殍

相望

隆慶己巳七月淫雨河水溢城不浸者數板

隆慶庚午民一產三子

萬曆癸巳蝗飛蔽天自西北來由三岔散去

萬曆辛卯子花蟲遍野知縣李茂春虔禱八蜡

廟未幾被鴉啄盡不爲害

萬曆丁酉正月初六日大風七月旱

萬曆戊戌五月雹傷麥七月澇務本鄉為甚

萬曆己亥二月初二日大風黃沙蔽日商賈罷

市秋七月霖雨害民稼務本鄉尤甚

萬曆四十三年大饑人相食

崇禎十三年大饑人相食小蝗傷麥

崇禎十五年城陷死者三千餘人

崇禎十六年正月二月日赤無光歷四旬有餘

又有兩日相盪

國朝

順治元年民間牛生犢二頭一身二尾

順治七年黃河水決溢至大清河淹沒田舍為

害六年

康熙三年大旱四年蠲免田租

康熙七年三月二十九日大風海溢數十里人

畜多傷六月十七日地震房屋多傾倒

康熙十年六月十九日大風雨樹木皆拔

塚墓

元

王昇墓去縣治西南二十里碑記見存

楊鑿墓去縣治南三里碑文存事見宦蹟

馮伯寬墓去縣治南三里碑記見存

明

李益墓去縣治北五里

廬陵趙應祥父墓今起去無存應祥不知何時人性至孝年十四其父行賈不還比長欲往尋以祖母年老不得行及祖母卒應祥年二十六

會有從父自北來言父故已久而不知其處應祥日夜哀號卽辭母往求父骨誓必得乃還聞都下有老者與父厚善卽走數千里往詢焉知父死濱州利津道又徒跣至得朱琪張文者言若父所葬棺具有題歲久榛莽翳翳塚墓纍纍不可辨應祥往復行哭七日求不得卽解髮繫馬鞍祝曰隨馬所之過吾父墳者當髮解鞍墮歷數墳不應忽經一墳髮解鞍墮發之棺上具有父姓名遂獲父骨歸

利津縣新誌卷之十
四
漏澤園在城南門外一里許廣袤各十畝成化十七年知縣陶福置

義塚在城西關外一里許崇禎壬午城陷城內死者近二千人舉人劉弘儒等設爲義塚斂其無主者葬之有石碑存

利津縣新誌卷之十

藝文誌

誌以記事也似於文藝無關然事非文則弗傳聖謨洋洋嘉言孔彰固可以勒諸貞珉卽下至碑記篇咏皆有裨於政治有係於風化用借以述稽旁覽不可缺也因考次而存之

御製

勅戶部主事李益

勅曰戶部掌戶口土田之事凡倉廩府庫噉計出納

隸焉其任重矣必得人資參伍爾李益今特授
承直郎戶部總部主事爾其夙夜惟寅以盡乃
職庶稱委任之意爾其懋哉

洪武十九年

勅監察御史隆英

勅曰朝廷設監察御史欲其振紀綱辨邪正以弼成
國家之治也厥任匪輕爾文林郎行在山西道御
史隆英發身胄監擢任牧民入居斯職歷年既
久式克慎勤是用

錫之勅命以示褒嘉夫官以察爲名以言爲職在男

大體而略細故在愛君子而戒小人其益端爾
志益堅爾守毋私于法毋撓于勢毋訐以爲直
毋苛以爲能明以矚之公以行之懋修而不懈
尚有顯爵以待爾成欽哉

宣德十年

勅太僕寺丞楊昭

勅曰國家馬政掌於太僕必牧養以其時生息有其
道而後資於用者蕃焉居長貳之職者非廉慎
公恕之士曷膺是選爾太僕寺丞楊昭發身胄
監擢任斯職馭歷年久勤慎有爲茲特進階承

德郎

錫之勅命以爲爾榮爾尚益端乃志勵乃行毋怠其

職用副委任欽哉

景泰四年

勅知縣馬傑

勅曰民牧之責莫切于縣匪得公廉愷悌之士曷克

稱焉爾陝西鳳翔府寶雞縣知縣馬傑發身胄

監擢任斯職歷年滋久政蹟有聞宜

錫寵章用旌勞勩茲授爾階承仕郎

錫之勅命以爲爾榮尚盡心勿怠厥職稱

朕養民之意

成化五年

勅監察御史李芳

勅曰朝廷設監察御史欲其振風紀舉憲綱激濁揚

清以弼成

國家之治也必得端方直亮之士乃克稱焉爾

廣西

道監察御史李芳發身賢科擢任斯職歷年旣

久茂著激揚宜

錫恩寵以旌勞勩是用進爾階文林郎

錫之勅命以爲爾榮爾尚益正乃心益潔乃行毋私

于法毋撓于勢毋訐以爲直毋苛以爲能夙夜
懋修用光寵命欽哉

成化十年

勅鴻臚寺寺丞李清

勅曰鴻臚寺之設所以肅朝儀典賓禮而宣制命於
會同也爲卿佐者非得明敏之士曷克稱焉南
京鴻臚寺右寺丞李清發身胄監擢屬鴻臚迨
進今官公勤匪懈宜

錫恩寵以旌其勞是用進爾階儒林郎

錫之勅命以爲爾榮爾其益盡乃心懋修厥職俾禮

儀弗忒以稱任用之意欽哉

弘治三年

勅國子監助教田禎

勅曰國監乃儲才之地非郡縣之學可倫師儒實分
教之官必科目之良是用向非歷試曷勝選掄
爾國子監助教田禎經術起家鄉闈登薦司儒
校而師模是著典文衡而品藻惟精比邈屬於
成均益留心于造士賢勞旣積最考是書宜有
渥恩以示褒勸茲特進爾階修職佐郎

錫之勅命於戲以身爲教豈徒課授之勤隨事効忠

勿諉官階之滯益臻來効以示超陞欽哉正德十二年
勅經歷尹通

勅曰國家設軍衛以安民雖專武職置幕臣以領務
則用文資寓意實深任人宜慎爾直隸永平衛
經歷尹通發身從事列職幕僚洎事詳明才既
優于幹濟操持清慎志尤篤于奉公歷歲浸深
課功惟最爰稽彝典用示

褒恩茲特進爾階登仕郎

錫之勅命於戲官不計崇卑必求其稱事不論難易

務底於成勉副訓辭以俟明陟欽哉正德十二年

勅南京刑部主事魏綸

勅曰兩京并建南京隆王業之基庶事分司主事佐
郎曹之政矧秋官之爲職實民命之所關匪得
其人曷稱茲任爾南京刑部浙江清吏司主事
魏綸性資純雅器識宏深早掇芳于鄉闈首居
官于邑泮學能成物舉模範以尊嚴心在憂時
見封章之剴切旌書屢上留署超遷折獄惟明
才實優於聰斷持身克慎志亦篤于操修歷歲

浸深課功惟寂宜加茂寵以獎賢勞茲持進爾
階承德郎

錫之勅命於戲奉公持法已徵宦蹟之良善始保終
勿替官箴之戒佇觀來効嗣有超登欽哉

正德十五年

勅監察御史田玉

勅曰朝廷寄耳目于臺憲宣隱達聰以決壅蔽振紀
綱厥責攸重

朕恒以得人爲難爾南京江西道監察御史田玉蔚
以科甲之彥屢試鉅邑政績著聞

朕因採諸薦揚晉爲執法乃能懋服官箴忠蓋自勵
激揚有體建白殊多爾其無忝厥職者哉茲特
進爾階文林郎

錫之勅命於戲 朕方渴于求治思直言敢諫之臣
爾其奮猷體 國開誠布公用副

朕懷欽哉

嘉靖十六年

勅刑部員外郎主事紀繡

勅曰朕惟刑部主司寇之任民命攸繫故置屬詳于
諸曹必得其人庶克稱焉爾刑部河南清吏司

署員外郎主事紀繡東藩才俊甲第名流筮仕
春曹勤勞允懋頃者擢居今職廉能之譽益彰
最績屢書官評攸重

朕甚嘉之茲特授爾階承德郎

錫之勅命爾其益盡乃心修乃業以副

朕惓惓恤刑至意欽哉

嘉靖十二年

誥進南京戶部郎中王聘爲奉政大夫

制曰地官之屬掌邦賦以濟軍國之用兩都均焉若

非通才難膺茲選爾南京戶部河南清吏司郎

中王聘茂學人推盛才天畀登甲科爲名進士

宰鉅邑爲良有司簡擢諫垣式昭忠鯁遷請再

更于郡邑明揚屢重于臺章爰陟今官克修厥

職會計實當勤廉有聲

朕甚嘉之茲以元祥 覃恩特進爾奉政大夫

錫之誥命爾其益盡忠節永樹來勲俾財用饒裕府

事充美時乃績也欽哉

嘉靖十五年

勅平順縣知縣王甲

勅曰縣令民之師帥也朕嘉循良之政固將下璽書

和濟縣志 卷之十一
褒勵之矧熊祥霈慶而年勞應于獎賞者平爾
山西潞安府平順縣知縣王甲清操亮節卓識
通材發跡儒科筮官壯縣蒞政暢廉平之譽宜
民敷豈弟之仁茲以覃恩授爾階文林郎

錫之勅命朕聞上黨山谷之間寇穴俱在今雖欲斂

數屏息其無忘勞徠緩輯俾長爲寧宇欽哉

萬曆

九年

勅臨洮府同知王協夢

制曰朕憫邊郡之不靖深詔有司慎簡良吏以寄專

城長貳雖殊其與

朕共理均也克副厥職茲惟艱哉爾陝西臨洮府同

知王協夢操履堅貞才猷敏練起明經而宰劇

邑由郡倅而貳邊方爾乃清慎有聞勤恭匪懈

能使兵儲饒給水利興修可謂無忝厥官矣茲

所司以治狀來特授爾階奉政大夫

錫之誥命夫國家選任賢良必歷試乃大畀焉爾一

試於邑再試於郡皆能其職

朕心所嘉也其尚益殫乃心將有顯陟欽哉

萬曆十七年

勅延川縣知縣王立身

勅曰令長爲朕保惠邊氓輯寧疆宇良亦勤矣藉令有善政而不加褒始忽於核實終略於考成則何以獎答臣勞風勵吏道爾陝西延安府延川縣知縣王立身承家節操奕世儒流筮仕考城素多遺愛逮移延水愈殫厥猷三年勞撫字之心兩地著廉明之譽茲當歲閱用授爾階文林郎

錫之勅命夫惻幅之吏求之甚勤得之至寡朕茲得

爾矣尚水肩一心增修實政毋負

朕所以崇獎之意爾亦終有令問欽哉

萬曆二十五年

勅秀水縣知縣李培

勅曰邑之有宰所使奉行德意子惠元元故程功計能不吝褒顯以風勸之制也爾浙江嘉興府秀水縣知縣李培才猷蔚茂經術純明拔起制科簡司民社曆年滋久治行來聞謂爾潔已奉公士與農悅真心實政卓有明徵是用授爾階文林郎

錫之勅命夫秀水吳之東壤 國家因其繁腴以拆
置此治也民繁則囂地腴則靡囂靡則彙孽滋
多不可問尚益思化導而輯寧之

朕不忘顯陟爾欽哉

萬曆二十年

勅戶部員外顧四明

勅曰版曹領錢穀之計而司庾爲重蓋六軍所託命
焉乃供者苦不時而出者虞旁竇欲清蠹峙積
非忠廉之臣弗任焉爾戶部山西清吏司署員
外郎事主事顧四明操履公方風規沉遠始以

大科之雋縮綬花封繼由文學之英橫經槐市
爰甄人望俾列地官而爾白意勤公焦神營職
督運無處膏之潤筦儲頌飲冰之清穴窟盡空
京坻立效居然異品展也深心茲以歲滿授爾
階承德郎

錫之勅命朕惟天下之財不在上則在下今府庫空
虛而百姓貧餓得無中飽乎爾歸自使吳所條
上已窺其微矣勿謂積習不可問推此意力行
之安知無洒濯相應者乎朕且崇畀以究爾用

懋哉

勅河南道監察御史李植

制曰錫類推恩朝廷之大典分猷亮采臣子之常經
爾河南道監察御史李植植節剛方服官敬慎
簡畀西臺之任懋昭謇諤之聲慶典適逢新綸
用賁茲以覃恩授爾爲文林郎

錫之勅命於戲弘敷章服之榮用勵靖共之誼欽茲
寵命懋乃嘉猷

文類

利津縣初建儒學碑記

趙孟頫

于昂元總

天地之大而斯文爲之主斯道之大而孔子爲
之宗所以苟非其人道不虛行非天下之至聖
其孰能與於此哉道之行也大都小邑莫不有
學天生聖人爲民君師袞冕有儀日星昭垂其
廟學之建亦云大矣有民社者其可不以爲首
務而亟圖之耶儒者高士謙亨以清流被擢來
尹茲邑久之政通人和風俗丕變乃卽堂廟草
創之區而大之中爲大成殿兩旁爲廡棟宇惟

飭像設如制築甬道以直其衝旁鑿二井泉甘而游之不窮也邑人縋金咸取給焉揆諸相類其殆先聖效靈之端乎然尹之果行育德勞民勸相之功亦精誠之一應也又建堂于廟之北將致師生以實之池沼園囿扈隔庫庾亦以就緒而儒宮之能事畢矣是舉也縣尹倡而任之監縣率而董之典佐以下從而贊之耆老豪右又從而衍助之或出俸金或發私幣或具行厨鄰人讓其地匠人効其功公徒執其役同聲附和

不約而齊文風德化之動人也如此哉居何典佐趙仁邑之耆長請來徵不腆之文以紀歲月于是叩其興造之始末亟爲之書寔至元三十年之八月也

重修大成殿記

張起巖

元學士章丘人

聖道昭然明如日月人孰不瞻仰而嘉敬焉堯舜三代帝王之大經大誌惟吾夫子爲能述之能明之所以師範百王垂憲萬世也唐宋迭興文教誕敷自國都而之郡邑莫不立廟建學而

尊禮之迨我聖元文明治世學校大興詔令有司嚴加勉勵朔望日官屬躬詣廟庭拜禮已畢卽升明倫堂講明正學使人各知孝弟之道根心固有以復乎本然之性而修齊治平之方循序而進焉則吾夫子之道益尊而堯舜之道益明矣文風熙然於斯而盛也濟南郡治利津縣舊有縣學先聖廟則未建前至元甲午歲縣尹高謙亨始建焉歷今五十七年風霜屢經不無摧圯至正己丑之秋亳州鹿邑人張著權是邑宰旣拜先聖周視廊廡已廢退而深恩作新首割俸金倡同僚邑人等重爲葺建不數月煥然一新備禮告成前所仰瞻者欣然起其向義之心越明年庚寅夏曹州濟陰縣張實偕臨汾縣杜光祖邑士馮之裕恭拜廟庭覩斯美觀謂教諭李搢廟學之興何無大成碑記則曰東津小邑瞻學之需闕如也故不能備耳實相顧曰以邑宰之賢敏於立事何無一言記之可乎實同邑士馮之裕等願輸已貲命工伐石允濟其功

碑成教諭李摺徵予文之予嘉其邑宰之賢而有爲邑士勇於向義而落成又嘉其教官與人爲善之誠有三者故不可以不記故文之以石以告邑人將見化成民俗之風油然而興起焉是爲記

重修龍王廟記

樊恩徵

鹽運司使

滄海吾知其至大江漢無不朝宗鬼神吾知其至靈祈禳無不感格祀無常享在乎克誠利津縣東海廣德靈會王行祀在焉惟神海之所主

也祀典載之詳矣夫軍國之需鹽貢是尚凡興作煎辦必借是神之佑莫不備香火割牲醴酒以奠獻誠則享而收功多否則不享而年額不足矣是知誠與不誠驗於吉凶捷於影響豈不信然至正辛卯正月辛亥朔奉議大夫同知山東路都轉運鹽使司事那海唐兀氏備檄分司濱樂到司越二日謁廟拜奠詢其所以乃前本司運使劉楫之荆建也自至正甲午迄今七十餘載風雨摧淋百工已圯公覩是荒涼愀然曰

不修可乎遂首捐俸金命工需材邑尹張著南
華張實同寅贊襄增廣一新經營於花朝之前
落成於蕤賓之後壯觀海宇俯瞰清河邑人偕
四方過者咸起敬焉由是乞潮則灘場生鹽禱
雨則禾稼茂盛占風信則鹽艘舸艦免狂濤之
險惟公忠敬之誠積於中而感格之機著於物
神人相協何其速哉僉感公誠咸曰不鐫翠琰
何以垂後衆曰然故代石徵余文以紀其略云
明景泰重修儒學記

袁純 教諭吉水人

利津縣隸濟南據齊魯之東卽禹貢兗州之域
古渤海地也隋唐時爲永利鎮金大定間始改
爲縣而建學校元至元甲午縣尹高謙亨因舊
學始建廟宇國朝仍之洪武永樂以來常修葺
而經久之圖莫之究心景泰甲戌王公容來令
是邑慨廟之敝乃謂二尹田公疇曰學校有司
首務其可緩乎遂相與鳩工掄材而作新之四
方商賈及邑之好義者各輸金粟若干棟梁若
于王時坐累不克落成田公獨任其事諏日興

工經始于巳卯之秋告成于癸未之夏廟自正
殿兩廡戟門櫺星門神庫學自堂齋重門周垣
悉煥然一新其後先贊相者則前縣令回公義
合賀公惠前判簿朱公王劉公整王公瑀今馬
公通暨于掌史單公或也夫以田公之盡心竭
力祇承朝廷德意而振舉學校可謂良有司矣
將使邑之俊秀游其間入廟而秉對越之誠升
堂而起進修之益其風化之厚人材之興必駸
駸乎其盛矣純典是邑教僉謂宜有言故特書

以識歲月

弘治重修城隍廟記

趙鏗 教諭

高皇帝創制立法幽明咸備城隍廟之設因之
故封域無大小必建立廟貌以爲妥神之所利
津舊廟去歲冬廟災幸武陟王侯宰是邑悼廟
圯壞遂募工會計泉帛無慮百餘緡浮植于河
輦石于山鳩工創造正殿三間列楹數十間其
他儀門齋館之屬亦一就緒落成之日侯率僚
案邑父老祀拜畢僉曰廟之成天人之助也盍

記諸因屬于余余曰物故則更事傾則起理數
然也矧城隍之神奉 勅饗食興利除害以保
我百里生靈當廟宇焚毀奚容不治今侯之涖
改革故鼎新廟貌壯觀亦嘉會也自是而幽明
協和楊休烈占嘉禎民俗醇士風振生齒繁年
穀登將十百千萬于昔矣侯之感格豈小補耶
余不敏敬述此以爲之記侯名嵩字允高以鄉
進士選居今官判簿程公弘幕賓荀君教司訓
顧君忠陰陽訓術李華義官李端始終程督云

正德間重修儒學記

李

芳

邑人按察使

學校之建所以登庸賢俊陶鎔作興之者則賴
師儒守令也濟南利津邑學自勝國至元甲午
縣尹高謙亨始建大成殿明倫堂歷五十七年
至正己丑傾圯時亳州張君著來尹茲土重爲
修理迨我太祖高皇帝龍飛淮甸奄有天下大
興文教勅海內官守鄭重學宮以教養生徒至
盛蔑以加矣自洪武永樂季歲湖廣蒲岐姚君
志寧河南睢州陳君泰率田進士相繼來尹吾

邑皆以學校爲首務以故堂宇維新講習有所
賢才丕振號稱賢令尹歷天順癸未僅百年堂
木蠹將傾時大尹冀州王君容勤于庶政而於
學校尤急決意經營而鼎新之嗣是以後科第
有人廡仕相繼殆非作新之驗歟又五十餘年
至弘治己丑堂之棟宇不堅將傾支以羈柱師
生肄業惟艱正德改元東吳太倉朱君諱表字
民望由進士來尹于斯下車三日謁廟畢登堂
習講顧堂之敝陋不寧謂諸生曰學校風化之

本而鄙儒易之崇飭有司之職而俗吏慢之不
知學校講堂所繫甚大師生朝夕肄業于斯有
司朔望聽講于斯春秋修祀事陳禮樂諸生駿
奔走習容儀又在于斯庸可緩乎於是不遑他
務首圖士夫且曰興作廢材不舉需于民民弗
堪取于官官弗給乃禮勸義官鄉耆等三十餘
員名皆樂助材木價銀百十餘兩移文撫巡布
政司府悉允其請遂講材鳩工然後撤而新之
時工善吏勤不逾月而鼎建焉棟梁雄偉磚石

堅完比之舊規縱橫各長一步許較之大成殿
低昂少讓二尺餘其大勢後先相輝俾師生習
講有地將來科第繩繩相繼誠千載英才所自
出之基也回視前尹姚陳二進士諸君之勤其
賢又遠高矣厥功落成僉謂予當記其巔末誼
不容辭遂銘石爲之記

魏公去思碑

蕭

鳳

國子監學錄
順義人

正德庚午夏御史魏公左遷利津丞時流賊起
趙魏間其勢猖獗公知城守不可緩以城隍甲

淺疎虞不足守乃集丁壯具畚插築高鑿深令
民備戎器日夜防守衆皆竊笑以爲賊所過無
堅城修此何爲雖聽命而實預擬徑竄以便奔
竄公聞之不懌益巡督不少休夜坐常達旦暑
雨不張蓋如此者半月一日賊騎千餘至城河
東無船不得渡衆以爲無虞公獨憂之會大風
河水冰堅遂渡河而賊之在河西者亦且以其
衆千餘繼至達旦公乃囑官吏會境內士大夫
豪俊分地防守又密使助請大兵于近地慮居

民米粟器物不徙反爲賊藉乃悉徙城中又以賊多虛聲恐喝陷城乃選輕騎數十使週馳城下通接聲問布置甫畢翌日賊果至營于西北郊去城二里許分其衆爲迭出之勢自晨至脯有發輒應賊計無所施始以其衆退尋大兵至殲滅無遺今歲春轉公魚臺令津人相謂曰津之生聚不至創殘衣冠無少污壞屹然爲渤海之一全城者誰之力與魏公之賜也公在則當祝以報之今公去矣其錄以志不朽可乎且使

後之守茲土者知所法也相與伐石立之通衢以予曩官其學又實分中北門乃詳述其前後狀爲記以垂之公諱彥昭字德輝保定容城人由進士歷官侍御史以忤逆瑾至左遷今公論旣明行復還京朝云

重修儒學記

魏

綸

邑人按察司副使

孔子之道與元化終始萬世仰其德者咸思報之自漢而下追崇之典稽之史可見已我國家列聖相承尊禮之隆超越前代且勅有司以作

興學校爲首務其良法美意載在盛典所以育才弘化經國立極者胥此焉嗚呼重哉是故學者始焉明道事以志也仕焉崇本獻以業也使徒誦其言以媒富貴及其得志也則視宮墻之傾頽如逆旅覩聖貌之塵埃猶土木者是則吾道之罪人也又若異端者鼓左道以誣民而廟宇遍于天下極其侈麗少有毀敗愚民輸金帛相與左右以成之會不旋踵至於學校之設所司間以財少匱而假之民勸諭之鞭朴之而每

有難色蓋以常行之道於福田之邪說迥異迷惑之久而引導之以歸正也甚難其所以鼓舞漸化者斯則良有司之責也利津古渤海繁庶之郡文物之會其學官之基圖聖賢之廟宇下逮師生授受之所燕寢之次俱軒豁弘敞甲於旁郡第以閱歲久漸就傾敝頃歲尹數易率因時補飭罅漏鮮克新之嘉靖癸未歲陝之同知劉公以賢科來尹我邑越日謁宣聖廟畢禮乃周視見東西廡兩齋圯甚且舊缺鄉賢祠其櫺

星門南直低東西交衢無所蔽鄉民騎乘者過而率以慢公歎曰廡之傾神胡以寧齋之廢土胡以肄晦厥前良胡以啓後之芳弗表乎神之宮胡以肅民之行凡此者皆急務也夫尹者學其道而有位者也民者由其道而有生者也蔽若此胡以辭其勞予當期歲成之衆以累歎懼弗酬公心公乃與二尹王公相與合謀公亦慨然助之令曰凡民之麗其刑者量捐貲與力若干贖若罪以爲理學助又令曰凡民富者其有崇佛教薄正道不夔力者非我民民咸悅以從命貲用以充乃擇殷朴耆民張漢等司出入筮日治基度材鳩工使事羣力以趨茲歲六月功告成計廡齋祠凡二十有三楹各繚以垣以堵計者幾百區門樓五大成坊一載完而美載壯而崇神用以妥民用以肅學者相顧語曰國之典公之政民之力厥惟艱哉吾儕翱翔容與乎其中務相明善勵行以揚吾道于天下用福而民用壽而國用酬興作者之勞其激昂之氣切

利津縣志
卷之十
三
偲之語疊疊如也相率而闖夫久大之域矣於
戲盛矣哉計是役也才良而選工浩而速費裕
而裕非果足以有爲威足以御衆謀足以計料
志足以圖終者疇克襄之其愬然於學校之廢
弛束手于愚民之陷溺者視公不亦惡甚哉君
子曰敦本起廢以崇政也佚道役惑以變俗也
試言建信以昭蹟也是咸足以詔夫後之尹我
邑於邑之仕四方者是爲記

重修南薰樓記

利津古渤海東屬邑也國初分疆因之縣治壯
麗凡瀕海諸縣皆以津爲稱首邇來凋敝彌甚
四紀于茲觀者慨焉嘉靖庚子秋我侯以天子
命來蒞茲土已而謁先師廟縱觀四境殆若丘
墟然因仰歎曰吁陋哉治也卽如富人之居家
尚且崇厥垣墉飭厥門戶至客舍燕寢廡塾之
建亦必增潤底華以侈後觀一縣治而廢弛至
此又何以集冠裳道政令聳具瞻乎于是殫心
區畫首事學宮次及公署帑藏之所次又及養

濟院鐘鼓樓又次及城城櫓門樓隍池橋梁二
尹郭公紀分理督責以襄厥事不數月煥然改
觀視昔增麗方定中經始之日適二府尹趙左
山以公事至咨諏侯改作之繁驚歎以爲之疑
圖南乃作而言曰久廢思興子來赴工民不勞
也經畫有方但新其舊耳財不傷也財不傷民
不勞侯政善也左山聞而喜曰若子能不替初
心以蒞政諸士夫能開誠布公以相繼治斯邑
也何有但見諸作底績南薰斯建葢離象文明
羣陰退聽新土類也傳曰南風之薰今可以解
吾民之愠兮殆謂是耶侯政教兼舉士庶胥慶
可無榆揚其盛德哉侯先丞河津遷宰蓬萊卓
有異政可錄侯姓趙諱思聰字文明關西延長
人因統記之

嘉靖重修儒學記

李順孫 邑人 參議

楊侯自庚戌之秋來令吾邑思學校乃作人之
地舉其廢而新之首修大成坊更其扁以爲萬
世宗師羣英萃聚示觀也次建名宦鄉賢祠于

明倫堂之東使諸生有所仰止又次修東西兩廡以象若賢且崇報祀也至於啓聖公無受神之地敬一箴缺珍藏之所凡齋堂文廟幾不可爲觀瞻侯心誠不能一日已亦其勢有不能直行者謀諸學官僉以誠之西碧霞行宮不便于學爲言侯乃請于宗師按察司裴公兵憲曹公毀厥浮圖發若磚石以爲補葺之助其掄材鳩工百爾會計悉侯自苦心力爲之絕無濫取於公私之間舉庠視昔殆彬彬改觀凡兩閱月告

成事予一日行學周覽因謂侯居官幾四年清勤慎如一况興建學校甚盛典也庠生郭躋輩謀於掌學楊君乞予文勒石以識不忘侯聞之語予曰學校作人事固大焉此自我裴曹二公主之某第奉行德意焉耳余何功若乃自此掇科第取通顯直其緒餘不較也然學止諸至足願與諸生勉之斯所謂不忘也已予以侯語諭諸生諸生曰唯唯是惟不忘請紀諸石是役也裴簿以從公後至不無贊畫勞儒學楊君張君

迨新幕任君皆樂觀厥成也楊侯名啓芳領南畿戊子鄉薦維揚寶應人

知縣楊公去思碑

王聘邑人戶部郎中

楊公知利津五年陞授漢中府同知比行百姓攀臥留之不可于是共謀立石以志永思而請予文予惟楊公之所以得民者豈有他哉亦惟其德澤在民人是以思之不能忘耳吾嘗聞其爲政矣如糧餉國家急務也公則清影射復逃移明書筭之總撤革秤頭之常例均河灘之撥

補在任五年初不苦民以刑罰而先後徭差平均田野熙熙無事公之恩亦深且渥也城池學校縣宇皆政之不可廢者公則不資民費料理修葺至捐俸資爲助下至申明旌善演武亭暨橋梁城門四樓亦皆次第修治煥然改觀焉凡有公出不以里役自隨惟圖書數卷而已政暇則與諸生訪經史考課業優禮士夫于其賢而貧者常有所資助待同僚如手足公初至縣倉儲庫銀無幾比行穀至二百有餘石庫銀至一

千六百有餘兩至于訟獄尤所注意每遇聽斷
不煩多辭曲直自判事無大小皆得其理由是
穀麥雙穗叠見于境內夫豈偶然之故哉公聰
敏過人臨事機警人不能欺膏澤旁洽於人則
夫旣去而思之不忘亦其宜也他日位台鼎聲
施華夏其德澤之深厚又豈特吾一邑之思而
已哉公諱啓芳字子春直隸寶應人乾菴其號
也

利津縣均田記

王學書

濱州人行人

賈公諱光大字實甫別號煦谷古雍丘世家胄
也明詩薦嘉靖己卯科隆慶辛未夏以才德簡
授津令下車來心惻民瘼洞察利弊慨然有均
田之志乃詢之士夫訪之父老議之僚佐籌度
便宜昭示萬姓省簞繩革夫役定尺步之制立
丈量之規嚴欺隱之戒寬自首之條慎清查覆
勘之任俾民各以其地自先照數丈量詳書濶
步四至于地次之糾劾于地鄰詳驗于方保坵
履于公正各造一冊遞縣備照於是躬自履畝

丈視始河稅糧一萬四千三百有奇今地稅昔
僅三分之一懼糧浮于地民不堪命又查官牛
開地七十頃五十三畝七分五厘新開荒地二
十四頃六十九畝九分河灘地一百八十五頃
六十四畝九分今丈量四鄉地二千七十三頃
一十七畝四分二厘通二百四十步成畝計之
實在地二千三百五十四頃五十九畝七分地
既均鄉民數十輩具其事徵予爲記以刻諸石
樹之通衢爲萬世賴予曰王政以養民爲先而
養民莫大於地利自井田廢于秦不均之歎至
今磬磬古人有志于限田均田者不阻于勢則
墮于利不辭乎勞則避乎怨竟不果行信乎均
田爲至難也賈公成功則易易焉蓋本之以忠
愛廉靜之德而濟之以公明剛果之才是以津
地悉均而澤及萬世矣凡夫享均田之利者頌
德寧有旣乎予自餉邊回田間有歌曰我有荒
蕪侯其開之我有災害侯其除之我有生養侯
其遂之於維我侯萬世仰之詢之乃濱民咏賈

公均田之德也吾濱如是則津民之戴者祠者
不亦深且久哉如賈公者其真海內循良之最
也與是舉也協謀贊襄分勞率先則邑幕朱君
之功居多朱諱俊甫廬陵人明達吏事小心廉
謹公委任之至若收票對冊釐弊防奸隱者舉
說者正一地而重書者削段同而數異者改有
二尹晉州谷君濟物三尹汝陽商君霽以殫厥
心焉例不可遺因併記之

賈侯生祠記

王學書 濱州人

世之稱循良者何立功德焉耳世之建生祠者
何報功德焉耳士君子析人之爵食人之祿受
八民而爲之牧之也厚斂以剝苛刑以戕置胞
與而燕越之胡可祠也間有加志閭閻祗醫瘡
塞竇計其朝暮煦煦然以希乳保攸歸亦婦寺
之仁耳其爲功德固剪剪也卽祠不祠焉能爲
軒輊哉比今令煦谷賈公治津也樂只施仁嚴
明立政夙夜憂厯爲蒸民以建石畫承委托而
丈度阡陌隴墅分限一新匿額者首包餘者蠲

荒蕪盡墾灘莽亦籍里書氓黎罔有奸欺百年
弊一旦剔矣給牛種則流移歸農省鄉總則里
甲安堵至於崇節儉裁冗費課士徒均徭役佐
海運宰津異政種種可則凡屬內壤僻門不施
胥吏之席耳不聞馨鼓之召愚婦歸遺蕩子息
賭秩秩乎循良矩矱也雖濱人亦與被藉藉焉
功德巍碩裨益宏鉅乃一方祠之百世孰曰不
宜適公戒裝北上以修述職之舊赤子恐其留
天朝以補袞闕不復遂其見也協謀立堂以祠
亦觀棠思召意也已事竣矣爰紛集予門丐言
以志不朽予曰稱情哉今之祠之也予居近津
土每見公爲政如迅雷烈電驟雨飄風見者秋
月皎皎空隙卽通纖毫畢照俾人人斂縮莫知
措置然察而不苛公而能恕則比室胥賴以自
保矣若而功德巍巍泰山之高也汪汪滄海之
深也州牧尚焉鄰邑倣焉以義起禮疇已於祀
耶祠建於縣治西關爲屋三楹築臺高闊可繞
墻垣併住守祠戶有餘磚石土木界之邑民爭

翰突地經營成於不日焉公之得民深哉而遺
 思應與廟貌著天壤間矣公諱光大字實甫別
 號煦谷登嘉靖乙卯科鄉貢進士大梁杞縣人
 也後之傳循良者曷稽諸

雙節表海序

狀元焦肱

嘗攷信六藝誠人子毀經滅性而婦人夫死則
 稱未亡人非其待男子之恕而督過於婦人者
 詳也男子之生桑弧蓬矢射於四方其用大故
 不欲一死以滅性婦人居閨閣帷第之中非一

醮無改儼然白著則無以成其為人上世聖人
 有見於此立師氏主教雖文王之妃妣氏亦俛
 焉稟學而不敢專婦人生是時者教以成俗習
 若性生相與規勉不曰君子偕老則曰及爾同
 死謠俗所漸視死如歸而無立節之名嗣是行
 穢桑間而共姜發憤則指天之怨切風淫中菴
 而唐媛攘袂則對日之誓嚴於是有出萬死一
 生之計以存呱呱之脉又有淬九死不回之操
 以成烈烈之名總女史所記劉向所傳何其夥

也此皆未有師氏之教謠俗所漸特就其資之所近慷慨追臆奮於一決而節始貴於天下嗟嗟世喪道道喪世易曰苦節不可貞其道窮也蓋傷之矣顧秉禮之君子若唯恐名不立節不彰思拳拳然表著之何也一繩不可以維大厦握沙不可以障潰湜而一繩與握沙之用自不可廢也矧東魯宣聖故都利津渤海舊邑王門兩氏夏以撫孤著高以殉夫著一死一生相與植綱常培元化其心後先出於一轍語云千里

一士猶接踵也百世一賢猶比肩也兩氏如和嬰公孫杵臼爲用不同其孤貞完節皆可以歸見死者而不怍是偉男子之事卓特之行也而又出於一時萃於一門厥唯盛哉無乃聖賢之流風餘澤入人也久兩氏生於其鄉耳濡目染故發乎情止乎禮義其不謀而同有如是也夏配諸生王濟高配王浦夏子長檢身訓胄官次立身今爲考城令有賢聲時以入覲至囊雙節詩文來謁乞一言以弁首余不能辭也因爲論

次之如此若其事之始末自有名公之著述在
茲不具

祭貞烈張氏文

許時雍 知縣

古人謂死有輕於鴻毛有重於泰山惟氏之死
有係於綱常者不知其幾千萬年間汝在室卽
丁家艱辛苦萬狀知命順天胡于歸之未幾時
忽置良人之棄捐汝能慷慨赴義瞑目就棺鎖
瓊臺于長夜隕璧月于寒泉此毅身成仁大文
夫所難爲而視死如歸乃出於閨門之少年我
等守土于津職司風化嘉汝之死立懦起頑寓
斯文以永歎冀貞靈之復旋尚享

新建名宦鄉賢祠

王立身 邑人

名宦鄉賢祠何祠名宦鄉賢也名宦者何高公
謙亨元之津令也鄉賢者何李公益明之方伯
也高公何取于名也建學崇祀士風振也守法
舉公官箴肅也李公何取于賢也主政司農厲
清操也保釐藩方勤惠政也是祠也崇功報德
大典也淑世勸俗大化也然則何爲而祀也庚

午之霽雨也然則何爲而新也邑侯之盛心也
邑侯者賈公名光大字實甫煦谷其別號也其
學邃葩旨也其跡奮鄉書也其文章擅中土之
華也其政事甦東津之困也其營斯工也非沿
襲其往日之度也舊跡兩楹茲益以四宏規制
也故事合祭茲分爲二隆祀典也名宦居左鄉
賢居右別懿範也經始于九月中旬落成于十
月中旬速子來也自是有感而興起者以陶士
類則思弘其作新之術也以恪官常則思配其
循良之德也以立朝宁則思追其清白之風也
以守藩臬則思繼其屏翰之績也是祠之有關
于世教豈其微哉然則啓佑後人者二公也克
光前烈者賈侯也好德之良古今所同則後之
祀今亦猶今之祀昔也是役也經之營之日省
月試丞侯谷君濟物也簿侯商君霽也蓮幕朱
君俊甫也協力贊工分勞督理掌教曹君松也
分教潘君應科也駱君棟也樂觀厥成紀言頌
功者甲子亞魁王子立身也

萬曆重修儒學記

輅 棟 教諭

利津縣廟學其來舊矣修舉廢墜雖代有人惟
乾菴楊侯重修於嘉靖間迄今三十餘載中緣
歲沴民匿遂因循弗葺頽壞殆甚至萬曆甲戌
夏郭侯奉

命尹茲邑下車謁廟登堂四顧蕭然蔽陋激目歎曰
學校教化之地豈容傾圮若是邑稱極困又不
當重爲勞費遂捐俸設處民有干政者量情輕
重任役民皆樂輸子趨其工始於乙亥之春至

八月告成凡廟之殿廡大門環墻學之堂舍門
垣壁甬與妥神之位庫庠之所奎壁之樓坊表
之牌無不整理完備繪飭煥然且振作多士墾
地二百畝立爲學田以周貧乏闔學諸生謀勒
石記事而屬予爲文予謂之曰諸士知郭侯新
學之功矣亦能知自新其學以慰郭侯之望乎
道德者吾心之實地忠信者吾心之根基仁爲
安宅義爲正路廉耻則其垣墉經史則其戶牖
也無亦能擴乃地崇乃基居安宅由正路固垣

新津縣志 卷之十
墻通戶牖日新又新懋修不已使吾心之太宇
常定而弗以外誘障蔽之則學成於內文見於
外由是而朝登俊彥之英邑擅科甲之盛柱石
廟廊帡幪黎庶端兆茲始可不勗諸同寅宋君
羅君曰是可以識不忘矣遂記於石

新創學田碑記

邵永豐

馮公來知津事邑緣兵荒繼作凋疲殆甚公新
政之日卽毅然思極輯之策尤以興賢爲首務
賑飢爲亟置閱學甫畢徧訪孤寒無依者以廣

周濟諸生仰承德意舉朝不謀夕者四十餘輩
以告公公仰天歎曰何東津之多寒士也卽捐
俸二十三兩有奇買地三十三畝有零以贍學
田俾貧有所養其田距縣治西八里坐落於彭
家店封界犁然俾後豪奸弗獲侵併良法美意
歌誦載道卽蘇郡之治何以加焉余由絳訓叨
諭茲庠覩公之盛舉矍然驚服遂偕司訓二王
公率闔學王子立身等伐石以記記曰於戲學
校治化所關興學莫先於養士故士類新而采

芹咏學校廢而捲堂刺古謂無恒產有恒心方稱士守惜吸糠飯藜猶日不一給如恒心何公始創學田俾藜藿之士得世世服休澤于無既且規畫起於心不外激于告勸價值取于俸不借支于公帑蓋千百世盛典哉而諸生之待養者詎可覲然不儆之心以自負乎上之所養耶夫使士而僅以糊口謀而怠時廢業不窮搜於理學之奧窔則服儒衣茹公租行不卓於市碌碌斯下矣抑或務墨莊于萬頃恃毛穎爲贏糧

侈貨殖置負郭田類百阡者亦利祿已耳奚士之足貴又奚養之爲尚當被滌其心田本仁以種講學以耨闢其方平其垣築其隴薙其穢俾義利之疆界嚴物我之畛域化拓億世藜蕪之學術則庶乎心如穀種性爲良田入則含腴嘯真而不爲糟粕出則罄蓄施濟而不爲餽餼彬彬乎人文蔚起以追美乎齊魯之舊實其作新力也藉令匪公之才之識出于世吏之上何以有茲舉耶公起家甲午鄉進士文武兼備孝友

著聞筮仕爲利津令本實心敷美政其最著者
捐俸餘以完逋租勤養賑以活衆命談笑解南
兵之圍踏勘恤東鄉之困暇則與諸弟子商確
文稅輯邑乘修奎樓待士之典迥溢于恒格云
公諱執中字允甫自號蘿石居士廣東東安籍
恩平人

萬曆重修儒學記

顧四明 邑人吉安知府

人文之盛衰也天耶人耶專責之人天命不容
誣也專責之天人事不可廢也二者將安取衷

哉吾論之吾鄉也吾鄉古渤海之永利鎮也金
明昌三年置爲縣此學之所由建也元以創爲
修文獻不足也國朝仍之王孟以下諸才輩出
稱盛也正德丙寅修之嘉靖甲申重修之則有
魏紀若而人李田王三氏父子相繼也萬曆丙
子重修之則有蓋李郭隆諸人不佞得濫竽也
天運人從耶人定勝天也我之所以疑而信也
嗣是以還頽敝者吾庠爲甚也落寞者亦吾庠
爲甚也撫人文者不能不動盛衰之感也因知

吾邑之疲也成侯莅之振衰起弱布法流慈小
民已樂生復性也侯傳芳累世尤重斯文也每
至先師前凡百圯壞曉不忍矚也因請監司
之諾不憚營繕之勞殿堂門廡補其頽敝仍舊
貫也樓閣齋亭擴其規模多前功也材良而選
鳩度精也費豁而裕慎省勤也經始于巳酉之
五月告竣于是歲之十月恩義之素鼓人如此
也于時諸生方沐浴化雨樂受陶鈞甫周年而成
侯去也以讀禮也繼之者李侯也任成侯之任

心成侯之心者也開羣蒙有講也率考課有會
也且甲乙之得序也寒暄之不輟也卻餽以敦
節也捐俸以周乏也又多士之奇遇也吾于是
知成侯之澤宏遠也李侯之澤深長也裔此而
修舉廢墜育養材賢吏茲士者可以風也於戲
上之懃懇不負士也士之策勵寧可負上也俯
盡人事仰答天命俾吾鄉地靈人傑與諸先達
輩並美者不佞之所厚望也亦吾邑之所藉光
也邇厥原本則兩侯之力也成侯爲誰諱道號

說齋畿南長垣人也李侯爲誰諱瀚號墨軒中
州商丘人也記之者誰從司農之後邑人顧四
明也

國朝

重修儒學記

李

植

邑人監察御史

歲辛卯名儒吳翁來令吾津越日謁

先師廟棟露而椽折登堂講讀瓦礫蒿萊不可步
因太息曰學校教化本崇飾有司職是誠在我
矣明年春遂議捐貲爲鳩工費時以百金先蒙

咸悅服從事若大成殿若戟門若櫺星門若萬
世宗師坊則因其舊而新之若明倫堂若啓聖
祠若教諭宅則無因而創之以妥神明効駿奔
至敬也弘樂育至仁也于是會謂余宜有言以
記歲月余因颺言曰昔三代盛時王公國都以
及習巷莫不有學其人而學焉者莫不有以知
其性分之所固有而俛焉盡力教化隆于上風
俗美于下今

天子屢詔郡國舉學校卽以其能否殿最有司屬我

公又盡心職事其意近古嗚呼遊吾庠者向學之心可以油然而興矣衆各唯唯願志不忘是役也諭君王諱復茂鄆城人訓君李諱若玉壽張人俱有贊理勞生員劉君堪趙君斐然紀君大生苟君允恭等左右拮据不遺餘力而堪尤積瘁殞躬爲士林所惜均不可以不誌也吳公諱志强號建侯三韓人公慈民甚深大美善政不可以枚舉茲特載其崇修學宮之事蹟耳他未遑遍及也是爲記

重建利津縣學記

李呈祥侍讀學士雲
化人

孔子之道與天無極天下後世罔弗率循其教所以一道德而同風俗者其用爲至深且遠也今國家隆平熙洽文教之所覃敷彬彬乎盛矣而吏治兢兢若惟徵發期會之亟未暇詩書絃誦之求豈聖人之道垂之萬世而無窮者至此或見爲迂遠而無以濟於時務與竊嘗取而推論之孔子之在春秋其及門高弟治賦爲宰者極一時剛果敏藝之才顯非後世勲名之彥

之所及而其所稱好學者一惟退然如愚之顏子顏子之學不外爲仁雖爲仁爲聖門第一義然其間問荅言人人殊惟顏子廸以由已而歸仁天下其功止在克復而其目則惟視聽言動千餘年來凡有志於聖賢之道者未有不以求仁爲兢兢也雖精微未可以驟幾要之耳目猶是則視聽猶是也口體猶是則言動猶是也千載而合符者寧不反身而皆備歟是以王者爲治必以孔子爲師而本於三代建學之意群民之秀而爲士者於其中以爲成德育材之地斯孔子之道之所以久而彌彰也服其教者果其謹於形器悉於象數其耳目口體之所感以爲視聽言動皆有不可亂之節與不可易之物以相深將見飭其耳目而其所不可遇者固已察矣約其口體而其所不可致者固已著矣其察其著由於服習而勤修故可以持久而不勌由是而興道致治不獨詩書絃誦已也爲明其是非於侯而復撻焉以示其儆記焉以俟其悔迨

其儆之不畏俟之不變則從以威斷之刑非所謂禮禁於未然而刑施於已事者乎苟其惕於刑必將復於禮是爲仁之決於一日而通於天下者不必有瑰異傑出之姿皆可反求而有獲矣爲士者旣謹其好惡以審於取舍彼民之觀感而興起者莫不尊君親上好義終事而輸將之恐後趨役之忘勞又何有於道德之不一風俗之不同道之垂於萬世者之不足以濟於當時與噫當吾世而能是是亦聖人之徒也何其不少概見也茲乃於利津邑侯鳳山李君遇之侯承尊先賢正心誠意之訓由濂洛關閩以溯洙泗之源故其爲治也仁心爲質其爲教也敦本爲務振德而士行端釐奸而民俗化親賢樂利比戶謳歌非所稱好學力行躬修有獲者乎曷言之利津之有學舊矣然大成殿之圯廢兩廡戟門之丘墟蓋閱數十年所矣李君來宰是邦拜瞻之下愴然興思曰學宮根本之地可聽其荒蕪不講乎雖然聖廟雖荒聖道不墜尚其

修之修之則儀刑在望入廟思敬後生有所興
起造就因以成功斯教行而道彰矣爰與學博
蔣君柱東集諸縉紳議諸縉紳咸義厥舉而尤
慮議焉而無成者屢矣候曰不然繫余責也遂
捐橐創建率衆攸行卽以州同知李博貢監生
紀璿總其事以貢生牟應極國學生劉選弟子
員李煥章紀琦武生紀克寬董其工由大成殿
而兩廡而戟門次第更新經始於甲寅九月落
成於丙辰四月宮宇巍峩廡門軒敞誠大觀哉

起視其時景仰雲從絃誦之聲不輟聞者興曰
美哉洋洋乎向也瞻拜靡止今則奉璋攸宜矣
向也鞠爲茂草之區今則化爲詩書之府矣邑
人士欣茲盛舉請記於予予自顧衰朽學殖荒
落奚能贊述其盛徽顧嘗辱侯之知若以爲可
與語者因思新會公甫陳子非侯之鄉人而祀
於廡者乎陳子論學以自然爲宗其功則由靜
中養出端倪侯之政教本於學問侯之學問務
在求仁是能以去私爲靜養以存理爲自然庶

幾見所爲克復者而又何患乎學之有異同古
今人之不相及哉孔子曰古之學者爲己今之
學者爲人程子曰古之仕者爲人今之仕者爲
己學仕一也而於爲己爲人之際遂分今古要
亦人之自爲今古耳則亦觀夫謨誥所垂臯夔
稷契伊傅周召非仕其所學者乎詩書所載顏
魯思孟周程張朱非學其所仕者乎雖出處不
同揆而微彰則一致一致者何曰仁也君子亦
仁而已矣邑長仁其政而以實心行之學官仁

其教而以實心導之諸士子仁其志而以實心
體之教立風行民樂生而好亂消士有耻而慕
義衆則刑罰可省禮義可興謂非仕焉而得其
所學者與乃斯道久廢矣獨殷殷於是也意其
在斯與予故卽其詩書絃誦之必謹其好惡先
士以及民而猶不刻刻於徵發期會而徵發期
會更不後肯且百廢興紀綱舉不事張皇而退
然一如如愚之子可不謂爲人之所不能爲而
知所當務者耶因爲之記以俟吏治之成焉矣

名應甲字山公鳳山其別號也辛丑甲辰進士
廣東潮陽人

題建學宮小引

李應甲

進士知縣廣東潮陽人

今之去聖人之世也遠甚然遠可邇在修修者
治而去之之謂也去其遠於聖人者求其可以
無忝於聖人者明四教叙五倫修之能事畢矣
夫是以修之於身修之於家修之於國與天下
誠不可一日而或緩也不可一日而或緩道將
奚從亦惟是肄習于宮牆駿奔乎俎豆瞻依其

儀型事既有所持循道自有其曲致則學宮重
地倫教攸繫尤不可闕焉而弗講也津邑夙稱
渤海名區其去聖人之居也實近近而遠眎之
則敬心生猶之遠而近眎之則愛心生也迺予
初下車拜瞻之餘觀廟貌之圯壞兩廡戟門櫺
星之丘墟殆不勝遠近廢興之感焉曰狼吞虎
噬以殘民生人所知也誠淫邪遁以賊民性人
未之知也明道先生有言治天下以正風俗得
賢才爲本予謂得賢才尤爲正風俗之本也維

茲根本之地鞠爲茂草後生無所觀感德造何由就將其何以興行而革俗耶爰與學博先生集諸紳士以閱修 聖廟爲諄諄無如魚頰馬竭鴻嗷鳥噍咸謂時際今日誰復樂聞絃誦之聲抑知文教聿新士爭慕義民共樂生則正人冠領芝荃並馨用以鼓吹大道青黃清淑將見光迴綺合共蒸雲霞以絢天豈猶蠅蝻之莫指哉甚矣修之誠不可一日而或緩也未幾而學博先生率諸生以倡捐請予故喜而弁其首

修建利津公堂記

李應甲

或問政曰爲君揆事布教以著善和元愷之治政也或問治曰問民間所疾苦與民更始俾卽衽席之安治也然則從政致治果有道乎曰有去其弊明其體道在是矣尊卑濶絕下情不得上聞其弊曰壅紛紜鬪茸奸宄得以潛伏其弊曰雜深居燕逸煬灶講張昏怠之弊其流爲荒壅雜而荒政將若何則亦惟是先憂後樂日進斯民而與之課晴問雨小民得見父母而言情

是爲親民之體先罰後賞日廸父老而與之讀法講義愚氓得望公堂而作肅是爲莊蒞之體古之王者立明堂以朝諸侯而出政治道準諸此下而公卿大夫以及庶司百執事莫不有臨蒞之樞機樞機之地政治之得失繫焉是不可不亟爲整飭也然竊怪依人者無成因循者固陋遑遑視官舍爲傳舍不以民事作家事遂至人異歲殊遷延而至於弊者可勝道哉余於癸丑冬奉

簡命來蒞津邑見其堂宇傾頽房科荒廢宅室潦倒不容膝惻然憂之憂其積弊之不除大體之不振其何以起教化而興政治與是以整飭之思勃不自禁而尤慮前此者灾旱游臻農失其業鍾乳未施勞役何堪無以乃搜捐携橐拮据經營越數月而宅廳蓋就遲一年而六房構竣又遲一年而大堂奕奕告成功扶杖而觀者曰瞻依邇止跂足而望者曰體統肅止相與躋堂彌觥熙然樂止或問其樂維何曰胡考之休其

勞孔多曰子來優優問何以至此曰婦子無恙時和年豐誰爲爲之歸之太空繫小民其無知又烏能識其所從問者唯唯請記貞珉記之者誰鳳山李子某也

題建 關廟鐘樓序 李應甲

邑之西有 關聖帝廟靈爽赫濯爲春秋廟祀之一邑內外咸依庇焉廟原無鐘而今有鐘釋子捧鐘樓簿求予叙予問鐘所從來則曰鐘原鬻宮曉鐘問何以至此則曰因鳴鯨樓廢而鐘

久虛順治初邑侯許公乃移置廟中予聞之喟然曰昔緣樓圯鐘墜故移置於廟今何鐘移樓缺乃更委於地是何所聞而來抑何所見而往耶然則是鐘之來也豈偶然與因思孔夫子周人也生山左關夫子漢人也生山右里道旣不相謀世代又甚濶絕然先後雖不同揆而廟祀則相爲比隣得無以孔子在東元氣浩蕩溫乎太和東之人習焉而忘關夫子在西威爽禁非嚴於律禮東之人奉焉而肅其亦以聖道弘深

之旨托之服教畏神之用大扣大鳴小扣小鳴
於以振厥聲靈於無教與是則鐘所由來之故
也可不建樓以位置之子故倡為是舉以了前
人未了之緣凡在依庇中者願其成其母愛

禱雨告城隍文

甲寅六月苦旱初九日深文
神約以三日為期十一日大雨

滂沱四鄉霽足至其越
境即止邑人尤稱異焉

李應甲

某自蒞治以來續聞京師戒嚴又遭客歲災荒
憂心軍國蹙額氓黎誠恐庚癸騰呼無以給衣
食供賦稅也維春三月陰雨優渥穗秀郊岐二

麥之得以頗告成功者神所賜也無何律楛林

鍾火燎阡陌覩日色之血赤聽農家之鴻鳴彼

蒼好生寧忍降割若此也無亦司牧失職致干

和而召盞也然土宇版章神人共蒞則旱乾致

譴寧獨司牧而云然維神聰明而正直則聽不

可以或濫也司牧不仁宜坐以罪百姓無辜當

惠以澤也用涓精誠藉黃冠而致禱速驅龍雷

為斯民亟請命也如其一時津出蘇架遂爾半

夜水滴李駿神所錫極昭靈德也敢不鼓吹馨

香以迓神貺

募修洪濟寺小引

李應甲

古刹洪濟寺乃勅建普度衆生一大法華也年
 久多傾可修崇而塗護之者僧證鏐發願演波
 羅蜜布施義坐關扣衆生橐中有以與厥舉予
 曰善然亦知波羅蜜中布施一語乎乃如來爲
 爾禿者設普度法爾今反以這法力轉委諸不
 禿者則何以故我師 孔夫子教人拯溺救饑
 道未嘗爲和尚設卽爾和尚祖師祇園說法布

地黃金亦止教爾和尚廣濟衆生便是了義且
 我聞博震且王一笠浮江這一笠子在毘盧中
 當作何觀又聞經云自頭足隨腦及諸所有罔
 不施這舍利子方將以丈大金身遍給衆生又
 何事瓊殿金闕扣衆生橐而朱塗丹護者爲適
 有赤脚頭陀和南語予曰喫居士爾不過爲胡
 行僧急得荒故發此難端而爲和尚下一針耳
 若論布施鬚禿奚擇焉夫崇佛以殿闕猶其居
 人以室家也今衆生惟日孳孳蠅驅角逐謀諸

橐中營彼良田美地爲室家計不遑遑計及佛
抑知經亦有言無人我相謂佛原具衆生相衆
生亦能具佛相衆生種福田卽是行地佛子合
享良田美地有室有家之樂佛子了因果卽是
無尚衆生合享瓊殿金闕朱塗丹雘之榮我今
布施卽布施我同條共貫一體尊崇願居士爲
衆生滌鄙吝腸登明覺路厨頭片糝紙角微星
具有無量功德其勿疑布施子曰阿誠如是言
是洪濟寺這座刹子當在大衆橐子裏討出願
無愛此一絲一粒遺却七寶藏中惹大利息也
亟以是言告頭陀嘻然顧笑不知所之

重修城隍廟記

林森 邑舉人

順治八年冬吳公來涖是邑政修惠覃百廢俱
 興事無失序之舉人有得所之誦朔望謁禮城
 隍神廟覓其殿宇傾圮諸布列者率淪斃敝壞
 公低徊咨嗟謂此大非所以安妥神明而鎮奠
 邦土也爰集人士旣然捐俸百金課役鳩工指
 揮受事因其故基者十之二三撤而更新者十
 之八九于是壯者獻力斲者獻技巧者獻能拮
 据交作若大殿之崇深寢宮之幽邃兩翼廊之

修厥兩小祠之緊密以及大門二門盡革之創
之併懲戒變像等故事悉皆肖其體貌飭以丹
青壯以屏繚以垣無不犁然改觀大足起人敬
畏頂禮瞻仰窿然迥異往格矣文學劉君堪綦
君衷純趙君斐然又能心公之心助貲而贊勳
厥事義民王茂春安公系又樂于趨任其勞故
工不難舉也經始于九年青章之月息力于十
一年天睢之月奠神而告成矣夫底致禎祥捍
禦災傷俾人民之陰受其庇祐神之職也不墮

往績不病役人俾鄉國悚服于神道之設教司
牧之職也今侯撫字勤勞四民樂業又鼎新神
宇康代天陰騭之化是饒有功於幽明也神之
昭昭豈不忻懌於公也哉合宜書勒以誌公之
德于不朽云公三韓人諱志强建侯其別號也

詩類

到利津

馬

聰

直隸人監察御史

東津地僻往來稀累歲逃亡未得歸若是賈生經此
處定應痛哭淚沾衣

利津城外

蔡晟 河南人濟南知府

陋巷寡人事往來無車馬疎村鳥雀喧夕照牛羊下
杖藜過東臯採菊動盈把聊復得此生眼前足瀟灑
予言恐未真請問忘言者

東津除夕卽事

羅睿 陝西人山東僉事

除夕雖寒興未孤詩方得句酒初沽絃歌儘讓侯門
樂此段襟懷似也無

明朝又是一翻春物物重生得一新只是兩般宜用
舊清風明月不嫌陳

東津述懷

胡宣 太安州知州

東津古渤海獨枕海東隅路僻人稀到天寒物未蘇
魚鹽饒地利桑棗了官租叔度來何暮臨風重鬱紆

利津行署雙栢

王璣 武定兵備僉事

雙栢亭亭翠相倚署屋端偶來披牖坐遂作故人看
勁節春仍瘦清陰夏欲寒海門風近惡為柱障狂瀾

次在庵王僉憲利津雙栢

魏綸 邑人副使

行臺雙栢樹勢欲近雲端不遇忘形容誰知刮日看
才驚歲月老性耐雪霜寒願長新枝葉微風玩綺瀾

王在庵利津觀海奉寄

前人

哲人有遠抱胸次吞萬壑劇富餘刃慷慨探溟渤
時當新雨霽羣籟息橐籥淳涵曠無際日月儵閃霍
天水淨相永海族渾難索東眺扶桑外萬里雷風薄
旌旄耀斥鹵呼導驚海若天吳吸浮漚九首遞伸縮
潮汐亦收斂不敢更噴簸奇幻千萬狀俯視但一勺
悠然欲乘桴涉險不驚愕嗟我數歲前豪思忽踴躍
戒僕驅款段無那筋力弱北抵王兒河沙淖馬沒脚
維時日車夕趨起前復却未竟訪戴願徒見煮鹽鑊
迺對勞力人傾濁共斟酌興淺亦寡緣追思增愧怍
我公清世望遐邇宗心學久矣觀於海况兼知者樂
川流在萬縷疏導竟歸約顧我望洋人竊窺愁浩博
願求敦化篇永作醫心藥

題烈婦楊氏

胡昭

湖廣寧鄉人
利津縣知縣

孀居五十載貞節世稱難中饋心無別孤幃分自安
淵澄秋月皎竹勁曉霜寒懿德關風化留傳與世刊

東津八景總題

趙鏗

臨海人

邑教諭

人傑由來本地靈一方佳致自天成東津渡早帆移

快西閣陽斜色映明夜到明樓收月色更殘費舍近
鐘聲海門浪煖春鯨變嶽廟風高秋氣清謙地有泉
常若醴聖池無草不通靈眼前物物皆成趣足暢吟
懷無限情

題東津曉渡

沐陽章忠

利津訓導

津河環帶碧流長舟子清晨渡口忙縹緲雲邊人競
濟汪洋浪裏掉輕颺尋常蕩漾沉波月來往棲遲向
曉霜幸際政平方繫纜行人猶似喚魚郎

西閣斜暉

趙鏗

西閣孤高倚翠巔等閑登眺趣無邊陽光黯淡將晡
景鳥陣縱橫欲暮天畫棟影隨殘照燦朱簾色映落
霞鮮恨無指劍揮戈手幾欲回轅輿浩然

明樓月色

章忠

百尺危樓宿構成收來月色十分明晶光掩映欄杆
碧嵐氣依稀瑣闥清極目望中海嶼小豁情登處斗
牛橫南樓乘興思庾亮更屬何人獨擅名

嶽廟秋風

趙鏗

岱廟層層貌像幽玲風動處豁塵眸松椿夾道蒼還

翠禽鳥依人去復留雲鎖空庭嵐氣濕露凝荒砌玉
光浮就中佳致吟難盡疑是蓬瀛一小洲

利津行署雙栢二首

甄

敬

平定州人兵備副使

雙栢亭亭植移來閱歲時迎風鳴鳳曲向日舞龍姿
翠葉交相映孤標迥自持寄言松與竹共訂歲寒期
本性依岩石移來植畫楹風霜經歲月雨露飽生成
遂作凌霄幹堪扶大厦傾會須辭剪伐千里送
神京

大清河公署新成

前人

高棟層軒枕碧流新城別館倍清幽停驂不厭詢田
父鎖印何妨對海鷗歷歷帆檣來遠岸蕭蕭漁笛下
前洲吏情兼得江湖興擬向滄溟萬里遊

豐國荒田瀟望喜賈縣尹招墾

甄敬

平定州人兵備副使

居民寥落傍河陽生事蕭條亦可傷海錯千家供賦
役灘鹽五月上官場樹稀乍聽黃鸝語水遠頻看白
鷺翔佩犢帶牛皆赤子喜聞遺愛有循良

公署卽雨擬泛海未遂

甄

敬

兵備副使

村市依流曲復斜土墻茅屋帶煙霞潮聲夜動千門

雪鹽蓋晴開萬頃花斥地經春無草木商船入夏作
魚蝦觀風暫駐皇華節泛海難從博望槎

均田至官竈城有感

賈光大

雍丘縣人利
津知縣

古城誰築在荒陬遺址猶存動我愁草色連天迷望
眼潮頭噴雪犯漁舟乍經茆屋人民少慣見沙洲狐
兔遊空有鹽花堆似玉年年辛苦幾時休

到利津書示諸友

張

梓

邑司詞

我生何坎壈來此寂寞鄉人煙一望斷言邁荆榛場
下惟有豹啼上惟有鳶翔徘徊誰與語獨自摧中腸

及境日方晏侯人近道旁手持縣令書迎我入官房
官房風雨後四垣皆頽墻編荆以爲戶啓閉亦倉皇
門者三兩人張燈解我裳勸我進餐飯偃息有繩牀
詰朝盛冠服鳴鼓彞倫堂諸生遠近至濟濟復踴踴
執禮稱孔肅習尚殊遐方大哉宣尼澤千載留茲芳
感此意惻惻令人轉彷徨憶昔有明訓瘠土民思臧
茲郡號斥鹵風氣無輕揚啜粟食蔬外珍味不一嘗
安分心靡他可以迪天常良心人固有存之當自強
我本聖賢徒與諸生頡頏譬彼登覺岸須用操舟航

一葦漾中流不得但徜徉辛苦我素諳僻地住無妨
况以助清節外誘驅助勦往我家食時志亦厭糟糠
托宿靜專地沃之水清涼芻豢勝膏腴太羹劣嘉飭
冥心會有契前盟豈遽忘觀法幸有資哲匠存出王
一朝意超豁始者誠如育古來作聖地儉德乃其綱
豢養終自畫事業歸茫茫吾党二三子勉旃深自防

同陳遊戎觀海

馮執中 利津知縣

出沒樓船耀碧空携尊鼓棹乘長風秦皇臺築三山
外漢使槎開萬頃中蜃氣初浮雲似墨珠光遙映月
如弓相逢正值昇平日牡礪墩前賞興同

前題

朱堯時 教諭

覽勝來遊渤海東揚帆全仗鷁樓風波遙蓬島滄溟
外鰲戴方壺蕩漾中一色水天連碧宇雙開雲霧見
晴空將軍且共浮杯醪此日中原奏膚功

前題

王拱極 訓導

一葦春風下海瀾漁航牙仗雨奇觀暫從杯酒尋融
樂豈爲遨遊訪石丹島嶼孤懸天外立滄浪萬頃鏡
中看壯懷當夕吟難盡回首沙鷗臥月寒

前題

王嘉祥 訓導

擊楫中流共快哉
嫖姚助興出新醅
水光渾與天光接
遠浪纔平近浪催
壯志何嫌鮫室隱
勝遊頻望蜃樓開
神君自有澄清日
也要攀鱗帶潤迴

過務本鄉

馮執中

馬首遍行務本鄉
蕭蕭四野盡荒涼
草根取作充腸物
木葉翻爲適口糧
百姓堪憐遭苦海
一官何敢望甘棠
但期緩爾逃移計
寒谷回春仗彼蒼

題夏氏高氏雙節

馮執中

天語傳宣出北都
東津雙節可標圖
九泉甘殞酬夫壻
一子堪存戀老姑
心比清河青史潤
名高泰岱碧雲孤
建坊更風賚莫說
于今節義無

浮海

王庚 邑人知州

聊將一葦掛長風
蜃市鮫宮入望中
極浦浮天連朔漠
驚濤浴日破鴻濛
桑田幻化知何處
弱水蒼茫未易通
且狎沙鷗食蛤蜊
相期汗漫問樊桐

洪濟寺晚雨

宋啓元 文登人邑教諭

雨落禪林靜
笙吹帶濕聞
烟深樓月渺
風細篆香分

破寂談僧舍忘機舞鶴羣
家園花竹笑躑躅但瞻雲

次前韻

李御章 邑人高密司訓

地僻垂簾迴雨聲和漏聞烟籠蘭色翠
風過竹叢分
琴濕叶蟬奏塔孤翥鶴羣禪林幽會處
高枕度浮雲

次前韻

林彬 邑貢生

雨花天外落靜裏梵聲聞鐘筵樓頭合
風鈴殿角分
披烟倚木榻研露走鵝羣
法眼知誰是安心問德雲

題利津八景

李應甲

東津曉渡

晴光澹蕩東園花浮日漾波擁赤霞
競渡花源望紫
氣飛來何處一仙槎

西閣晴暉

清風吹透錦城春西閣彩霞映紫宸
憑眺眼能開萬
戶時聞縹緲有笙陳

明樓月色

危樓百尺鑑初開海色津光落酒杯
好景乾坤無界

限取携到得問霧臺

黌舍鐘聲

長夜一醒塵土夢曉鐘何事隔牆聞聖賢原有棲真處不在聲傳只在君

海門春浪

乘流鼓楫極滄溟海漲春雲入望青曉月忽開千樹眼五山煙島殿東扃

嶽宇秋風

古柏荒臺碧草悽水晶宮殿海桑迷不堪帝子弄笙瑟爲倩踈鐘向鳥啼

古井甘泉

泉從山上瀉來清鹵地難將冽水呈爲有淵源深百尺濁流混處獨標名

聖水霧池

野靜山遙煙水渺有龍蟠在靈之沼政平人和雨露滋閒對重樓龍不擾

乙卯秋分較山左闡竣事觀趵突泉因次趙韻

二首

李應甲

月明滄海鑑虛無閒步郊雲探玉壺流洑百千特地
湧澤誇七十與天枯斛珠震電開三峽屑雨霏花灑
五湖黃鶴樓餘松雪韻鐘鳴鼉鼓興難孤
選勝名流若箇無巧將白玉蕩冰壺勞勞大地頻推
潤混混源泉不教枯爲相歷山綿帝澤潛䟽濟水入
王湖盈虛幾度如川逝一嘯天門鸞鶴孤

辰日依杜老秋興二首 李應甲

露冷金莖映碧暉上弦新月正霏微十年天上書初
寄八月嶺南雁不飛學取金丹將骨換爭如青劍與

心遠東津客旅浪雙屐何事憑秋索草肥

江城歷落斗杓斜不覺病來鬢轉華萬里蕩餘惟寶
劍百年梗泛有仙槎遙聞外塞吹羗篴忽起中原動
戍笳舉首不堪回首望故園叢桂此時花

立秋次日七夕次李吉津先生見寄韻之一

一葉秋光下紫霄空青澹澹駕誰橋芳辰預擬星雙
會曉景徒懸歲一招乞巧無詩夢不穩還驂有鶴信
非遙欣將彩筆頻分韻砧杵千家酷炎消

七夕迴文

李應甲

津東濯錦翠碧影映波清新夢催殘葉綠煙浮紫觥
銀將河織巧鵲以漢飛平因有雙星會頻思結鶴盟

柳庄

李應甲

靜墅動風鐸森林踈雪孺冥心天地老無夢鬼神寧
書富鄴侯架迹追陶令廳浩然時一嘯振壑作鸞聽
客豈盡山簡園何必辟疆花竒嬌作韻調雅逸浮觴
撫劔生幽興聞歌發故狂載將問字酒傍取梅枝香

利津縣誌原敘

不佞

叨令利津時戊戌冬十月也會有國征

之役從海上輸芻粟利津當孔道于時健兒
數千雲集汀河揚言守凍實謀索餉居無何

且脫巾呼矣

不佞

單騎抵壘慰諭之衆稍戢

隨奉檄給餉冒雪夜馳者再四遂解其謀津

連歲不稔菜草相望流移轉徙膏草野者無
算爲急白于當道當道俞之奉檄賑之粟給
之粥旣又覈最窶者散之金錢諸所捨藥畀
棺肩摩踵接也以是無遑他及間被詢故實
因檢前令雍丘賈實甫所修邑乘鴻織具載
可稱有用之書而歲月稍久事多闕佚適

佚捐俸鳩工新聚奎樓甫成博士弟子員俱

集相與商確而補其事之闕佚者凡四閱月
始成書爲卷七時滇南朱景熙以乙榜董其
事司訓則巢陵王嗣興古黃王汝麗皆博雅
士也不佚東粵鄙人無能爲役書成景驟遷
日照令而邵君來董教樂觀厥成不佚聊弁

數語以記時月因付之剗刷氏

萬曆二十八年歲次庚子知縣恩平馮執

中重修敘

書利津縣志後

邑何以志也以固疆圉則有志以興
教化則有志以崇政治則有志以極
奸暴以培善良以淳民風則有志
之數者闕焉不講邑何以志也若乃
據舊聞而循固陋舊志具在又何

以志也志可易言哉前任青藜梓
君蒞津未期旬邑志告成抑何才
高筆掾環至而立有效耶迨予膺
命下車遍閱城垣則道路交錯城門踈
朗如櫛敵樓可勿問矣疆圍之
謂何相若

文廟則殿廡戟櫛鞠為茂草教化之
謂何臨蒞公署以風雨不蔽無以
肅具瞻六房丘墟無以稽古示曠
政治之謂何至其市虎黨結健
訟風行君子道則消小人道則長
興行敦信之謂何者為載攷厥

志於城池則曰疆修於公署則曰
令似於學校則曰多圮廢於風俗
則曰是立司風化者惟邪稗俚習
則呢。不置其何心志也夫志信史
也邑之興廢繫焉是必取其懋
修成憲我者有可考足以昭來許
而垂後世者勅為一書以成一邑之史
而志稱焉志可易言哉予因按臨茲
土與有風勵表章之責故特取所
其系重者為之懋明而彙舉之以無
存於闕俾後之徵文考獻者少蘄
蕪之剛之譏則是志庶幾於信而

可傳者夫其繁亂而家華削焉
以後之史氏之為其亦多之為其亦多
康熙丙辰夏五泐陶李應甲書於

泐之劫系延堂



縣誌附序

誌也者政治沿革民俗盛衰之所由傳也閱
誌者考沿革而善張弛之宜察盛衰以端風
教之準將傳其所以傳也予初蒞時閱津誌
所載其于民俗不無今昔僥醇之感逮稽之
案牘而德色評語講張變幻之習亦或時有

而要不盡如誌之所傳唯愚民一念競勝輒
自盡而以人命控者月且數見嗟乎移風易
俗寧予之庸庸可以冀效顧任忝司牧縱諸
務未遑而子民之輕生可徒謂

功令

所不督而莫之省耶由是申飭誘掖不憚舌
敝頰禿而復爲設立專籍察有情罪關切行

誡以速兇悍怙終者讞懲後親加節註概限
朔望赴卯時而厲警時而勸誨亦時而以近
日行事察詢于其鄉之排甲隣右不圖意之
所主而習俗相戒遂與從令者有殊諸如凌
轢把持干犯名義橫暴鄉里之習寢就衰息
而命案亦復漸稀年來圖歲不一二見也嗚

呼水濡火烈寬猛之效大畧可覩顧求諸父
毋斯民之誼風勵之未能而至與愚懦相競
以嚴苛心所不忍而亦誼所不敢矣今津民
之切于從意如此使苟有所以用其心而爲
之董倡率先民情必不我負可知也因悟津
邑民風固無改于昔日之淳邑誌所傳非以
薄斯民而將以厲有位也予滋汗赤矣因附
書以自勉云

康熙庚申季春武林黃章序

國

國立中央圖書館藏書印

